
Sauh Iman

(Asas-Asas Doktrin Kristian)

Evelyn Tan Hwee Yong

Upstream Publishing

Sauh Iman (Asas-Asas Doktrin Kristian)

hakcipta@Tan Hwee Yong

Pelukis kulit buku: Kee Hup Thong

Ayat-ayat Alkitab diambil daripada Alkitab yang diterbitkan oleh Lembaga Alkitab Indonesia 2010, dan diubahsuaikan ke dalam Bahasa Malaysia, khususnya ejaannya. Hakcipta terlindung undang-undang.

Hakcipta terpelihara dan tidak dibenarkan mengeluarkan mana-mana bahagian bab, isi Kandungan, buku ini dengan apa juga bentuk dan cara apapun, sama ada elektronik, fotokopi, mekanik, rakaman atau lain-lain, sebelum mendapat izin bertulis daripada Upstream Publishing.

Diterbitkan oleh
Upstream Publishing
C703 Block C, Perdana Condo
PJU 8/1, Damansara Perdana
47820, Petaling Jaya, Selangor.

hweeyong@yahoo.com
Facebook: Tan Hwee Yong
Facebook: Upstream

ISBN:

Dicetak oleh
JESS CONCEPT
No. 20-0-8 Jalan 1/108C
Taman Sg. Besi
57100 Kuala Lumpur

Penghargaan tertinggi kepada
SSMC, Methodist dan
SIAC (Iban Methodist),
rakan-rakan sekerja Kerajaan-Nya
di Sibu, Sarawak

Kandungan

Ikhtisar Buku Ini	4
Pelajaran 1 Ciptaan Manusia	7
Pelajaran 2 Pemeliharaan Tuhan	19
Pelajaran 3 Dosa	31
Pelajaran 4 Siapakah Tuhan Yesus?	45
Pelajaran 5 Penjelmaan Tuhan Yesus	59
Pelajaran 6 Kayu Salib	72
Pelajaran 7 Kebangkitan Kristus	82
Pelajaran 8 Kenaikan Tuhan Yesus	94

Ikhtisar Buku Ini

Buku Saah Iman bertujuan menolong umat Kristian memahami asas-asas doktrin Kristian secara teratur. Orang Kristian yang belum menerima bimbingan iman yang kukuh boleh menggunakan buku ini untuk mendewasakan iman. Pembimbing pengajian Alkitab boleh juga memakai buku ini untuk membimbing kelompok kecilnya.

Buku ini dibentangkan dalam rangka yang mudah difahami:

- a. Bahagian Pertama ialah penjelasan ringkas pelajaran yang ingin diselidiki. Bahagian ini sebenarnya pendahuluan yang bertujuan menolong pembaca memahami tema yang ingin dibincangkan.
- b. Bahagian Kedua ialah Permata-Permatanya yang merupakan pokok-pokok penjelasan tentang tema yang didasari dengan firman Allah.
- c. Bahagian Ketiga iaitu Saat Berbincang, soalan-soalan tersedia untuk menolong anda membimbing kelompok atau mengulang kaji tema ini. Jawapannya tidak disediakan kerana pendekatan untuk menggalakkan anda mengaji setiap pelajaran dengan teliti dan mencari jawapannya.

Aku berdoa Allah akan menyingkap segala rahsia mengenai Diri-Nya yang istimewa dan luarbiasa khususnya penjelmaan-Nya, kematian-Nya, kebangkitan-Nya dan kenaikan-Nya untuk bersemayam di kanan Allah Bapa kepada anda.

Biarlah hati anda melayang kepada Dia yang bertakhta di syurga sebagai Raja, Imam Besar, dan Pengantara kita.

“O, alangkah dalamnya kekayaan, hikmat dan pengetahuan Allah! Sungguh tak terselidiki keputusan-keputusan-Nya dan sungguh tak terselami jalan-jalan-Nya...Sebab segala adalah daripada Dia: Bagi Dialah kemuliaan sampai selama-lamanya!” (Roma 11:33-36)

Evelyn Tan Hwee Yong
September 2013

PELAJARAN

1

Ciptaan

Cerita Dongeng Dayak

Dalam kalangan suku Dayak wujud sebuah cerita dongeng yang menceritakan tentang ciptaan manusia. Pada zaman dahulu pernah ada dua ekor burung enggang, seekornya jantan dan seekor lagi betina. Dua burung ini bertengkar kerana berebutan buah dari taruk pohon hidup. Pohon hidup ini mempunyai emas dan buah daripada gading. Mereka berebut-rebut sehingga pohon hidup ini hancur tetapi justru kehancuran buah ini keluarlah seorang lelaki dan perempuan iaitu pasangan yang pertama.

Dalam kitab Upanisad agama Hindu dunia ini dikatakan berasal daripada Brahman, bukan penciptaan tetapi pengaliran zat Allah. Ia pengaliran daripada Brahman seperti labah-labah memintal sarang dari tubuhnya sendiri, atau cabang-cabang atau akar-akar yang menjalar dari satu

pokok. Jadi alam semesta mengalir daripada zat Brahman yang menjadi punca asalnya.

Ciptaan Menurut Alkitab

Alkitab berkata “Pada mulanya Allah menciptakan langit dan bumi” (Kejadian 1:1). Pada mula-mulanya bumi tidak ada bentuk dan kosong serta gelap gelita. Allah berfirman, “Jadilah terang.” Lalu terang itu jadi” (Kejadian 1:8). Alkitab mengatakan Allah menciptakan dunia ini dalam tujuh hari dan berdasarkan iman kita percaya hal ini. “Kerana iman kita mengerti, bahawa alam semesta telah dijadikan oleh firman Allah, sehingga apa yang kita lihat telah terjadi daripada apa yang tidak dapat kita lihat” (Ibrani 11:3).

Hari Pertama : Ciptaan Terang (Kejadian 1:3-5)

Hari Kedua : Langit and pembahagian air (Kejadian 1:6-8)

Hari Ketiga : Tanah kering dan tanam-tanaman
(Kejadian 1:9-13)

Hari Keempat: Cakrawala yang memberi terang
(Kejadian 1:14-19)

Hari Kelima : Burung dan ikan (Kejadian 1:20-23)

Hari Keenam : Binatang dan manusia (Kejadian 1:24-31)

Permata-Permata Tentang Penciptaan

1. Penciptaan Karya Tritunggal

“Ciptaan ialah karya Allah Tritunggal yang mendatangkan semua yang wujud, sama ada yang berjasad atau bentuk rohani, kewujudan sesuatu yang asalnya daripada kekosongan.”¹

- a. Melalui Tuhan Yesus Kristus segala-gala yang di dunia diciptakan, baik alam rohani mahupun jasmani.

“Kerana di dalam Dialah telah diciptakan segala sesuatu, yang ada di syurga dan yang ada di bumi, yang kelihatan dan yang tidak kelihatan, baik singgasana, mahupun kerajaan, baik pemerintah, mahupun penguasa; segala sesuatu diciptakan oleh Dia dan untuk Dia”
(Kolose 1:16).

- b. Pada waktu penciptaan dunia dan manusia, Roh Kudus aktif dalam penciptaan.

“Bumi belum berbentuk dan kosong; gelap gelita menutupi samudera raya, dan Roh Allah melayang-layang di atas permukaan air” (Kejadian 1:2).

- c. Allah Bapa terlibat dalam ciptaan ini selain Tuhan Yesus dan Roh Kudus.

“Namun bagi kita hanya ada satu Allah saja, iaitu Bapa, yang daripada-Nya berasal dari segala sesuatu dan yang untuk Dia kita hidup, dan satu Tuhan saja, iaitu Yesus Kristus, yang oleh-Nya segala sesuatu telah dijadikan dan yang kerana Dia kita hidup”
(1 Korintus 8:6).

2. Mencipta Dari Kekosongan

Allah kita Esa, oleh kerana itu, ciptaan-Nya dan Pencipta tidak berasal daripada sumber atau zat yang sama. Allah mencipta segala yang bertubuh atau yang rohani daripada kekosongan (Lat. *ex nihilo*). Berdasarkan firman-Nya, dunia dan segala isinya telah diciptakan.

- a. Ciptaan berasal dari firman Tuhan. “Oleh firman TUHAN langit telah dijadikan, oleh nafas dari mulut-Nya segala tenteranya” (Mazmur 33:6).
- b. Dengan Perintah-Nya ciptaan ada. “Sebab Dia berfirman, maka semuanya jadi; Dia memberi perintah, maka semuanya ada”(Mazmur 33:9).
- c. Ciptaan-Nya teratur. “Berfirmanlah Allah: “Hendaklah segala air yang di bawah langit berkumpul pada satu tempat, sehingga kelihatan yang kering.” Dan jadilah demikian” (Kejadian 1:9).
- d. Allah juga tidak mencipta sesuatu daripada bahan yang sudah sedia ada sebelumnya. Allah mencipta manusia memang daripada bahan yang sudah diciptakan oleh Diri-Nya bukan disediakan oleh yang lain. Contohnya, Allah mencipta manusia dari debu yang sudah diciptakan-Nya, dan binatang daripada tanah ciptaan-Nya (Kejadian 2:7; Kejadian 2:19).
- e. Allah telah mencipta dunia ini tanpa pertolongan manusia atau sains, Dia endiri yang membentangkan langit dan bumi:

“Beginilah firman TUHAN Penebusmu, yang membentuk engkau sejak dari kandungan: “Akulah TUHAN, yang menjadikan segala sesuatu, yang seorang diri membentangkan langit, yang menghamparkan bumi-siapakah yang mendampingi Aku?” (Yesaya 44:24).

3. Allah Mencipta Sesuka Hati-Nya

- a. Allah tidak perlu mencipta dunia atau manusia namun Dia telah menciptakan-Nya menurut sesuka hati-Nya. Kita mungkin tidak memahami kenapa Tuhan mencipta kilat petir, atau burung unta yang lucu perangnya:

“Kemudian suara-Nya menderu, Ia mengguntur dengan suara-Nya yang megah; Dia tidak menahan kilat petir bila suara-Nya kedengaran. Allah mengguntur dengan suara-Nya yang mengagumkan, Dia melakukan perbuatan-perbuatan besar yang tidak tercapai oleh pengetahuan kita” (Ayub 37:4-5).

- b. Dia menciptakan semua demi untuk kemuliaan-Nya. Biarlah pujian anda dinaikkan atas ciptaan-Nya. “Ya Tuhan dan Allah kami, Engkau layak menerima pujian dan hormat dan kuasa; sebab Engkau telah menciptakan segala sesuatu; dan oleh kerana kehendak-Mu semuanya itu ada dan diciptakan” (Wahyu 4:11).

4. Manusia Dicipta Menurut Gambar-Nya

Allah mencipta manusia daripada debu tanah dan menghembuskan nafas ke dalam manusia. “Ketika itulah TUHAN Allah membentuk manusia itu dari debu tanah dan meng-

hembuskan nafas hidup ke dalam hidungnya; demikianlah manusia itu menjadi makhluk yang hidup” (Kej. 2:7). Pada hari yang keenam, Allah mencipta manusia, ciptaan Allah yang teristimewa, dan merupakan mahkota ciptaan-Nya.

“Berfirmanlah Allah: “Baiklah Kita menjadikan manusia menurut gambar dan rupa Kita, supaya mereka berkuasa atas ikan-ikan di laut dan atas ternak dan atas seluruh bumi dan segala binatang melata yang merayap di bumi” (Kejadian 1:26).

Hal ini sungguh istimewa kerana daripada semua ciptaan, hanya manusia dicipta menurut gambaran Allah. Origen mengatakan Tuhan Allah menciptakan manusia menurut rupa Allah bererti manusia memiliki tabiat yang berakal, dan melalui ketaatan mereka kepada Allah, mereka menjadi serupa dengan-Nya. Kebanyakan ahli teolog menjelaskan gambar sebagai bahagian manusia yang memiliki akal, kehendak, dan peribadi. Anthony Hoekema menulis bahawa “Kita tidak patut berfikir gambaran Allah sebagai kata nama tetapi kata kerja, kita menjadi gambaran Allah melalui cara kita hidup, dan intipati gambaran Allah ialah kasih kita bagi Allah dan orang lain.”²

Allah menciptakan manusia dan menjadi sahabat mereka. Dia sangat mengasihi Adam dan Hawa, dan Dia memberi mereka taman Eden untuk menikmati semua burung-burung, buah-buahan, bebunga. Mereka sangat gembira kerana mereka menjadi kawan-kawan Allah. Allah selalu bercakap-cakap dengan mereka, dan berjalan bersama mereka.

Allah menciptakan manusia bagi diri-Nya sendiri. Seorang bapa gereja yang terkenal Augustine pernah berkata,

“Engkau telah menciptakan kami bagi Diri-Mu Sendiri dan hati kami hanya akan tenang kalau kami bertenang dalam Engkau.” Manusia diperkenan bernaung di bawah kasih dan pemeliharaan-Nya untuk menikmati ketenangan bersama Allah.

Matlamat kehidupan manusia yang tertinggi ialah memuliakan Allah dan menghayati Allah selama-lamanya (Pengakuan Westminster). Allah berharap kita hidup suci dan menurut perintah-Nya yang kudus supaya menikmati kehadiran-Nya. Kita dipanggil memuliakan-Nya kerana Pencipta kita yang tertib dan mulia. Segala yang kita kerjakan mendatangkan kemuliaan bagi-Nya.

Adam yang diciptakan dalam rupa Allah mampu memahami wahyu Allah bagi dirinya di dunia ini. Dia memahami kebenaran Allah dengan begitu jelas, dan dapat melaksanakan segala yang diperintahkan Allah. Adam mampu memberi nama-nama kepada ciptaan Allah seperti yang diperintahkan Allah kepadanya. “Manusia itu memberi nama kepada segala ternak, kepada burung-burung di udara dan kepada segala binatang hutan...”(Kejadian 2:20). Selain itu, dia memberi nama kepada penolong yang diciptakan sepadan dengannya, Hawa.

Adam dan Hawa yang diciptakan menurut gambaran-Nya, kudus, serta berserah sepenuhnya kepada Allah. Dia dipisahkan dan dikhususkan bagi Allah; hati mereka hanya bagi Allah. Manusia taat kepada Allah dan melakukan segala yang disenangi-Nya. Mereka hanya mahu melayani-Nya dan mengetahui kehendak-Nya sahaja. Tidak pernah sesaat terlintas dalam niatnya untuk menyeleweng daripada kehendak Allah yang kudus.

5. Keperihatinan Allah Atas Manusia

Dalam Kitab Kejadian 2, kasih dan keperihatinan Allah terhadap Adam digambarkan. Adam ditempatkan di Taman Eden yang berarti nikmat. Di sini Allah menyediakan segala yang diperlukan manusia. “Lalu Tuhan Allah menumbuhkan berbagai-bagai pohon dari bumi, yang menarik dan yang baik untuk dimakan buahnya; dan pohon kehidupan di tengah-tengah taman itu, serta pohon pengetahuan tentang yang baik dan yang jahat” (Kejadian 2:8).

Allah mengambil berat akan Adam dan melihat dia sungguh sepi tanpa kehadiran teman yang sepadan dengannya. Allah pun mencipta seorang penolong untuk menolong Adam dengan menggunakan salah satu tulang rusuk Adam. Matthew Henry seorang pentafsir Alkitab memberi satu tafsiran manis mengenai ciptaan Hawa:

*Tidak diciptakan daripada kepalanya untuk mengepalainya
Bukan daripada kakinya untuk diinjaknya
Tetapi daripada sampingnya untuk sepadan dengannya
Di bawah lengannya untuk dilindunginya
Dekat hatinya untuk disayangi*

Di Taman Eden ini, Allah meletakkan peraturan bagi Adam dan Hawa. Mereka harus taat kepada Allah dan tidak boleh melanggar perintah ini. Pelanggaran perintah ini akan meretakkan semua harmoni dan irama dalam perhubungan mereka dengan Allah.

“Lalu TUHAN Allah memberi perintah ini kepada manusia: “Semua pohon dalam taman ini boleh kaumakan buahnya dengan bebas, tetapi pohon pengetahuan tentang yang baik dan yang jahat itu, janganlah kaumakan buah-

nya, sebab pada hari engkau memakannya, pastilah engkau mati” (Kejadian 2: 16, 17).

6. Tujuan Manusia Dalam Ciptaan

Manusia tidak diciptakan untuk menggapai cita-cita sendiri melainkan untuk memuliakan Allah.

Allah tidak menciptakan manusia agar mereka bersantai-santai sepanjang hari dan menikmati belaian angin serta makan rojak di bawah pohon nyiur. Ya, Allah memang berkenan memberi kita saat beristirahat, saat bekerja sebagai irama kehidupan. Diperintah-Nya juga, “Beranakcuculah dan bertambah banyak; penuhilah bumi dan taklukkanlah itu, berkuasalah atas ikan-ikan dan burung-burung di udara dan atas segala binatang yang merayap di bumi” (Kejadian 1:28).

Kita diperintah pandai-pandai memelihara dan menguasai sesuatu dengan berhasil. Orang yang diciptakan oleh Allah perlu taat menghargai tanah yang diberikan Allah dan memajukannya. Perintah “taklukkannya” tidak berarti kita membotakkan alam dan merosakkan alam kerana ketamakan tanpa memikirkan pemuliharaannya. Kita diperintahkan oleh Allah untuk menjadi pengurus yang bertanggungjawab dan berhikmat ke atas alam kita, bukan meracuni semua ikan di sungai.

7. Segala Ciptaan Baik

Semua ciptaan yang berasal daripada tangan Tuhan sangat baik. Apabila Allah melihat tanah yang menumbuhkan pelbagai tunas muda, bijirin beraneka warna dan jenis, pohon-pohonan,

buah-buahan, dan ikan-ikan yang berenang ria, Dia melihat semuanya baik (Kejadian 1:12, 18, 25). Semua itu baik berarti semua yang diciptakan oleh Allah itu baik dan tidak ada yang jahat dalamnya.

Tidak ada sesuatu yang diciptakan oleh Allah boleh dianggap sebagai haram. “Kerana semua yang diciptakan Allah itu baik dan suatu pun tidak ada yang haram, jika diterima dengan ucapan syukur”(1 Timotius 4:4). Yang haram datang daripada manusia sendiri bukan berpunca daripada ciptaan-Nya. “Apa pun dari luar, yang masuk ke dalam seseorang, tidak dapat menjajiskannya, tetapi apa yang keluar daripada seseorang, itulah yang menjajiskannya”(Markus 7:15).

8. Hayatilah Ciptaan

Ayub mencabar kita untuk menghayati kebesaran ciptaan-Nya dengan perasaan yang penuh takjub dan syukur.

“Sungguh, oleh kerana itu hatiku berdebar-debar dan melonjak dari tempatnya. Dengar, dengarlah gegap gempita suara-Nya, guruh yang keluar dari dalam mulut-Nya. Dia melepaskan ke seluruh kolong langit, dan juga kilat petir-Nya ke ujung-ujung bumi. Kemudian suara-Nya kedengaran, Allah mengguntur dengan suara-Nya yang mengagumkan; Dia melakukan perbuatan-perbuatan besar yang tidak tercapai oleh pengetahuan kita” (Ayub 37:1-5).

Bolehkah kita bergelak tawa apabila melihat burung unta seperti yang diceritakan Allah kepada Ayub? Burung unta yang boleh berlari begitu pantas dan menendang dengan begitu kuat, namun sangat cuai, dan kadangkala menginjak telur-telur sendiri!

“Dengan riang sayap burung unta berkepak-kepak, tetapi apakah kepak dan bulu itu menaruh kasih sayang? Sebab telurnya ditinggalkannya di tanah dan dibiarkannya menjadi panas di dalam pasir, tetapi lupa, bahawa telur itu dapat terpijak kaki dan diinjak-injak oleh binatang-binatang liar” (Ayub 39:17-18).

Ciptaan dan Saya

“Ciptaan meyakinkan kita tentang kesetiaan Allah terhadap perjanjiannya. Sama seperti hari dan malam berlansung, janji-janji Allah pun seteguh ini. Ciptaan meyakinkan kita bahawa Dia akan mencukupi segala keperluan kita. Pertolongan kita adalah daripada Dia yang mencipta syurga dan bumi (Mazmur 121:2; 146:5-10). Dia yang mencipta segala sesuatu tidak pernah lelah, dan akan memberi kekuatan kepada umat-Nya yang lelah (Yesaya 40:26-31). Pencipta juga setia kepada mereka yang menderita bagi-Nya (1 Petrus 4:19). Sama seperti ciptaan baru tinggal tetap, demikian juga umat-Nya (Yesaya 66:22).”₃

Saat Berbincang

1. Siapakah yang terlibat dalam karya penciptaan manusia dan segala yang di dunia ini? (Kejadian 1:1; Kolose 1:16; Kejadian 1:2; 1 Korintus 8:6)

2. Adakah manusia berasal daripada zat yang sama dengan Allah?

3. Allah menciptakan manusia berlainan daripada ciptaan lain, jelaskan keistimewaan ini, dan bagaimana ia harus mempengaruhi cara kita hidup. (Kejadian 1:26)

4. Apakah yang dikehendaki oleh Allah daripada manusia, dan maksudnya “taklukkannya”? (Kejadian 1:28)

5. Bagaimanakah Allah menunjukkan kasihnya kepada Adam? (Kejadian 2:18, 22)

6. Nyatakan satu hal yang berbeza dalam ciptaan dan Allah. (Mazmur 90:2)

7. Renungkan keunikan satu aspek ciptaan dan berseru dalam pujian anda kepada Pencipta langit dan bumi.

PELAJARAN

2

Pemeliharaan Allah

Pemeliharaan ialah “kelangsungan tenaga ilahi yang terus menerus-- Pencipta sedang memelihara semua makhluk-Nya, sedang berlansung dalam semua yang sudah berlaku di dunia, dan mengarah semua perkara hingga ke akhirnya yang ditentukan.”⁴ Pemeliharaan Allah yang diceritakan dalam Alkitab sungguh hidup. Calvin berkata, “Pemeliharaan Allah menekankan TUHAN setelah mencipta dunia, terus menerus menopangnya, memperbaharainya dan mengaturnya.”

J. Wesley Brill berpendapat, “Tuhan Allah memang menaruh kuasa di dalam makhluk-Nya dan ciptaan-Nya supaya semuanya teratur dan dapat berjalan sebagaimana

mestinya: akan tetapi Tuhan juga ikut campur dan mengatur segenap alam ini dan makhluk-Nya. Jelas, pekerjaan ini juga dibuat oleh Yesus Kristus. “Dia adalah cahaya kemuliaan Allah dan gambar wujud Allah dan menopang segala yang ada dengan firman-Nya yang penuh kekuasaan...” (Ibrani 1:3).⁵

Permata-Permata Pemeliharaan Allah

1. Pemeliharaan Seluruhnya

Pemeliharaan dan penguasaan Allah tidak hanya terbatas kepada orang Kristian atau gereja sahaja tetapi seluruh bumi. “Sesungguhnya, TUHAN, Allahmulah yang empunya langit, bahkan langit yang mengatasi segala langit, dan bumi dengan segala isinya” (Ulangan 10:14).

Pemazmur yang selalu sedar hal ini selalu memuji Allah atas kebaikan-Nya dan keagungan-Nya.

“Puji TUHAN, hai jiwaku! TUHAN, Allahku, Engkau sangat besar! Engkau yang berpakaian keagungan dan semarak, yang berselimutan terang seperti kain, yang membentangkan langit seperti tenda...yang membuat angin sebagai suruhan-suruhan-Mu, dan api yang menyala sebagai pelayan-pelayan-Mu” (Mazmur 104:1-4).

2. Pemeliharaan Umat-Nya

- a. Dalam contoh cerita klasik, pemeliharaan Allah atas negara Mesir dan umat-Nya dinyatakan sewaktu musim kemarau dan kelaparan terjadi. TUHAN telah meng-

- a. gunakan Yusuf jauh-jauh hari untuk menghadapi masalah ini walaupun Yusuf terpaksa mengalami perjalanan hidup yang berbelit-belit. Segala yang berbelit-belit bermaksud tertentu dalam pemeliharaan Allah yang esa.

Yusuf berkata kepada abang-abangnya, “Maka Allah telah menyuruh aku mendahului kamu untuk menjamin kelanjutan keturunanmu di bumi ini dan untuk memelihara hidupmu, sehingga sebahagian besar daripadamu tertolong” (Kejadian 45:7).

- b. Secara intim Allah terlibat dalam kehidupan umat-Nya, Dia tidak memerintah dari jauh. Sewaktu umat Allah bersungut-sungut kerana dibawa keluar dari Mesir dan mengalami kelaparan, Tuhan curahkan pemeliharaan-Nya.

“Dan berkata kepada mereka: “Ah, kalau kami mati tadinya di tanah Mesir oleh tangan Allah ketika kami duduk menghadapi kualiti berisidaging dan makan roti sampai kenyang! Sebab kamu membawa kami ke padang gurun ini untuk membunuh seluruh jemaah ini dengan kelaparan” (Keluaran 16:3).

Allah berfirman kepada Musa: “Sesungguhnya Aku akan menurunkan dari langit hujan roti bagimu; maka bangsa itu akan keluar dan memungut tiap-tiap hari sebanyak yang perlu untuk sehari, supaya mereka Kucuba, apakah mereka hidup menurut hukum-Ku atau tidak” (Keluaran 16:4).

3. Pemeliharaan Penghuni Syurgawi

Jangkauan pemeliharaan dan penguasaan Allah termasuk segala makhluk syurgawi dan roh-roh. “Kepada TUHAN, hai penghuni syurgawi, kepada TUHAN sajalah kemuliaan dan kekuatan” (Mazmur 29:1).

- a. Dalam Kitab Yehezkiel, malaikat-malaikat syurgawi dikuasai oleh roh dan setia melayani Tuhan. Malaikat-malaikat yang di bawah penguasaan dan pemeliharaan Tuhan selalu memuji dan menyembah-Nya.

“Ke arah mana roh itu hendak pergi, ke sanalah mereka pergi, dan roda-rodanya sama-sama terangkat dengan mereka, sebab roh makhluk-makhluk hidup itu berada di dalam roda-rodanya” (Yehezkiel 1:20).

- b. Yesaya dalam penglihatannya menampak makhluk-makhluk syurgawi menyembah yang Maha Kudus.

“Dan mereka berseru seorang kepada seorang, katanya: “Kudus, kudus, kuduslah TUHAN semesta alam, seluruh bumi penuh kemuliaan-Nya” (Yesaya 6:3).

- c. Sewaktu Iblis ingin mencuba dan menyeksa Ayub, TUHAN meletakkan batas dan Dia mengawal atas Iblis. Roh jahat pun tunduk di bawah autoriti-Nya.

“Maka firman TUHAN kepada Iblis: “Nah segala yang dipunyanya ada dalam kuasamu, hanya janganlah engkau mengulurkan tanganmu terhadap dirinya.” Kemudian pergilah dari hadapan TUHAN” (Ayub 1:12).

4. Pemeliharaan Atas Alam

Semua kuasa alam berada di bawah takluk-Nya yang Maha Besar dan Maha Kuasa. Baca Yunus dan segera kita tahu TUHAN berkuasa atas angin badai bahkan ikan besar mahupun pohon dan lalat yang kecil dapat melakukan kehendak-Nya. Yunus ditelan oleh ikan atas kehendak TUHAN.

“Maka atas penentuan TUHAN datanglah seekor ikan besar yang menelan Yunus, dan Yunus tinggal dalam perut ikan itu tiga hari tiga malam lamanya,” (Yunus 1:17). Lalu atas penentuan TUHAN Allah tumbuhlah sebatang pohon jarak melampaui kepala Yunus untuk menuangnya, agar ia terhibur daripada kekesalan hatinya. Yunus sangat bersukacita kerana pohon jarak itu” (Yunus 4:7). “Tetapi keesokannya, ketika fajar menyinsing, atas penentuan Allah datanglah seekor ulat, yang menggerek pohon jarak itu, sehingga layu” (Yunus 4:6-7).

5. Pemeliharaan Atas Individu

Pemeliharaan Allah sering dicurahkan kepada individu-individu tertentu secara ajaib; ini menunjukkan Allah kita Sahabat yang menjaga dan mengetahui selok belok hidup kita.

- a. Tuhan mengirim makanan kepada Elia melalui seekor burung gagak dan juga melalui seorang janda. “Pada waktu pagi dan petang burung gagak membawa roti dan daging kepadanya, dan ia minum dari sungai itu.” (1 Raja-Raja 17:6)

- b. Hana yang melahirkan bayi Samuel, begitu yakin dan pasti bahawa itu jawapan doa daripada Tuhan. “Untuk mendapat anak inilah aku berdoa, dan TUHAN telah memberikan kepadaku, apa yang kuminta daripadanya” (1 Samuel 1:27). Tuhan menyendeng telinganya untuk mendengar tangisan seorang wanita yang mandul lalu mengaruniakan seorang bayi yang kelak akan menjadi imam.

- c. Pemeliharaan Tuhan juga jelas dalam kehidupan Daud sehingga dia jelas bahawa Tuhan Allah ada Gembalanya.

“Sekalipun aku berjalan dalam lembah kekelaman, aku tidak takut bahaya, sebab Engkau bersertaku; gada-Mu dan tongkat-Mu, itulah yang menghibur aku. Engkau menyediakan hidangan bagiku, di hadapan lawanku; Engkau mengurapi dengan minyak; pialaku penuh melimpah” (Mazmur 23:4,5).

- d. Anak-anak Allah termasuk kamu dan saya yang mengalami pelbagai ujian dan penderitaan perlu menyerahkan segala kekhuatiran dan penganiayaan kepada Allah Maha Kasih yang memelihara kita. “Serahkanlah segala kekhuatiranmu kepadanya, sebab Dia yang memelihara kamu”(1 Petrus 5:7).

6. Pemeliharaan dan Kuasa-Nya

Dalam Perjanjian Lama, Allah seringkali menggunakan negara kafir untuk mendisiplin umat-Nya yang sering menyeleweng dari jalan kebenaran-Nya.

Pemeliharaan Allah

- a. Bangsa asing sebagai alat murka-Nya sering dinubuat oleh Yesaya. “Dia akan melambangkan panji-panji kepada bangsa dari jauh, dan akan bersuit memanggil mereka dari ujung bumi sesungguhnya mereka akan datang dengan segera, dengan cepat!” (Yesaya 5:26)
- b. Tuhan yang tuntun umat-Nya keluar dari tanah Mesir, memelihara mereka dan mengikat Perjanjian dengan mereka namun Dia sering dikecewakan. Negara lain akan digunakan untuk mendisiplin mereka agar mereka dan Allah dapat bersetuju dan berjalan bersama-sama. Nabi Amos memberi amaran yang jelas, “Sebab itu beginilah firman Tuhan Allah: “Musuh akan ada di sekeliling negeri, kekuatanmu akan ditanggalkan daripadamu, dan purimu akan dijarah!” (Amos 3:11)
- c. Sebaliknya, atas anugerah dan pemeliharaan Allah juga, pemerintah dan penguasa seperti Raja Koresh, raja Persia digunakan Allah untuk membebaskan umat Tuhan kembali ke Yerusalem dan untuk mendirikan rumah bagi-Nya.

“Pada tahun pertama zaman Koresh, raja negeri Persia, TUHAN menggerakkan hati Koresh, raja Persia itu untuk menggenapkan firman yang diucapkan oleh Yeremia, sehingga disiarkan di seluruh kerajaan Koresh secara lisan dan tulisan pengumuman ini: Beginilah perintah Koresh, raja Persia: Segala kerajaan di bumi telah dikaruniakan kepadaku oleh TUHAN, Allah semesta langit. Dia menugaskan aku untuk mendirikan rumah bagi-Nya di Yerusalem” (Ezra 1:1,2).

7. Pemerintahan Allah Kekal

Daripada generasi ke generasi, pemerintahan Allah kekal. Peristiwa-peristiwa beredar dari musim ke musim, gejala bangsa-bangsa dalam sejarah manusia tetap di bawah pengawalan-Nya.

- a. Nebukadnezzar, raja yang sombong dan meninggikan diri, yang telah direndahkan sehingga seperti lembu yang meragut rumput akhir mengakui kuasa Allah.

“Tetapi setelah lewat waktu yang ditentukan, aku, Nebukadnezzar, menengadah ke langit, dan akal budiku kembali lagi kepadaku. Lalu aku memuji Yang Maha Tinggi dan membesarkan dan memuliakan Yang Hidup kekal itu, kerana kekuasaan-Nya ialah kekuasaan yang kekal dan kerajaan-Nya turun termurun” (Daniel 4:34).

- b. Dalam penglihatan Yohanes, dia melihat dan mendengar suara nyaring dari syurga yang bersangkakala tentang jenis kerajaan-Nya.

“Lalu malaikat yang ketujuh meniup sangkakalanya, dan terdengarlah suara-suara nyaring di dalam syurga, katanya: “Pemerintahan atas dunia dipegang oleh Tuhan kita dan Dia yang diurapi-Nya, dan Dia akan memerintah sebagai raja sampai selamanya” (Wahyu 11:15).

8. Pemeliharaan Tuhan dan Penderitaan

Manusia cenderung bertanya, “Kenapa Tuhan?” apabila penderitaan dan kejahatan semakin memuncak di Malaysia. Mengapakah orang yang tiada berdosa terpaksa mati?

Mengapa beribu-ribu bayi dilahirkan terencat akalt? Masalah sosial menyebabkan orang yang tidak berbuat jahat menderita di tangan orang yang tamak.

- a. Tanpa ragu-ragu Alkitab menggambarkan seluruh manusia sudah jatuh dalam dosa. “Sebab itu, sama seperti dosa telah masuk ke dalam dunia oleh satu orang...” (Roma 5:12). Dunia kini bukanlah dunia dan manusia yang seperti diinginkan oleh yang Maha Kasih. Keinginan Allah ialah manusia terus berjalan seiring dengan-Nya namun pemberontakan kian memuncak. “Semua manusia telah berdosa dan jauh daripada kemuliaan Tuhan” (Roma 3:23).

- b. Dosa, maut, tangisan, penyakit dan kejahatan yang datang menyerang makhluk-Nya tidak berlarutan hingga kekekalan.

“Lalu akau mendengar suara yang nyaring dari takhta itu berkata: “Lihatlah, khemah Allah ada di tengah-tengah manusia dan Dia akan diam bersama-sama dengan mereka. Mereka akan menjadi umat-Nya dan Dia akan menjadi Allah mereka. Dan Dia akan menghapus segala air mata daripada mata mereka, dan maut tidak akan ada lagi; tidak akan ada lagi perkabungan, atau ratap tangis, atau dukacita, sebab segala sesuatu yang lama itu telah berlalu” (Wahyu 21:3,4).

- c. Hari penghakiman tetap ada sekalipun kejahatan dan ketidakadilan seperti sering muncul sebagai juara dalam masyarakat. G.C. Berkouwer ahli teologi dalam suatu pembahasan berkata, “Pandangan Kristian yang muktamad ialah pujian, pemujaan Allah atas

kemenangan-Nya atas semua musuh-Nya.” Jangan lupa ada suatu hari Yesus Kristus akan kembali lagi sebagai Hakim Ilahi dunia, dan semua hal yang tidak adil akan diadili.

- d. Suatu penghiburan yang terbesar ialah Tuhan Yesus yang menjelma sebagai manusia pernah mengalami segala penderitaan dan kesakitan yang kita alami di dunia ini. “Sebab Imam Besar yang kita punya, bukanlah imam besar yang tidak dapat turut merasakan kelemahan-kelemahan kita, sebaliknya sama dengan kita, Dia telah dicubai, hanya tidak berbuat dosa” (Ibrani 4:15).

Pemeliharaan Tuhan Dan Saya

Helmut Thielecke menasihati agar kita jangan melihat segala peristiwa hidup secara berasingan. Peristiwa-peristiwa ini ibarat kain tenunan yang dilihat dengan kaca pembesar; apabila diamati dekat, tampaklah corak tengahnya dengan jelas, namun pinggirannya agak kabur. Tanpa sebarang keraguan, kita tahu bahawa pinggiran tenunan itu jelas dan secantik yang di tengah. Thielecke dengan penuh hikmat mengibaratkan banyak hal yang tidak dapat kita fahami seperti pinggiran kain tenunan yang kabur. Akan tetapi, semua ini harus ditafsirkan dari sinaran cahaya terang yang kita lihat di pusatnya, Kayu Salib. Kita tidak boleh terhumbang dalam keraguan akan kebaikan Allah atau menelitinya berdasarkan peristiwa-peristiwa yang terasing. Jelas, Allah sudah menyatakan sifat-Nya dan menyatakannya secara terharu di kayu salib. “Dia, yang tidak menyayangkan Anak-Nya sendiri, tetapi yang menyerahkan-Nya bagi kita semua, bagaimanakah mungkin Dia tidak mengaruniakan segala sesuatu kepada kita bersama-sama dengan Dia?” (Roma 8:32)

Saat Berbincang

1. Cari satu aspek yang mengagumkan khususnya pemeliharaan Allah di alam dalam Mazmur 104:1-30.
2. Bagaimanakah Allah memelihara dunia ini? (Mazmur 104:21, 27, 28)
3. Apakah yang dikatakan oleh Pemazmur mengenai kelahiran dan masa depan anda? (Mazmur 139:13-16)
4. Apakah ayat ini mengatakan tentang pemeliharaan Allah terhadap diri anda? (Matius 10:30)
5. Adakah kita patut merasa kecewa sewaktu melihat orang jahat seakan-akan terlepas daripada semua kesalahannya? Kenapa? (2 Petrus 2:9)

PELAJARAN

3

Dosa

Dosa tidak berasal daripada Allah kerana intipati-Nya ialah Kudus maka kekudusan-Nya tidak dapat diuji. “Apabila seorang dicubai, janganlah dia berkata: “Pencubaan ini datang daripada Allah!” Sebab Allah tidak dapat dicubai oleh yang jahat, dan Dia sendiri tidak mencubai siapa pun” (Yakobus 1:13). Ayub memberitahu yang berakal budi bahawa Allah tidak mungkin melakukan kefasikan atau yang Maha Kuasa dapat melakukan curang (Ayub 34:10).

J.D. Douglas menekankan intipati Tritunggal ialah kekudusan: “Oleh kerana kekudusan merangkumi setiap sifat Tritunggal, ia bersinar paling cerah daripada semua sifat yang merangkumi-Nya. Seperti sinaran mentari yang menggabungkan semua warna spektrum sewaktu bersinar, dan menjadi satu terang, demikian juga dengan pernyataan Allah,

semua sifat-Nya bergabung dengan kekudusan. Kekudusan atas sebab ini dikenali sebagai sifat daripada segala sifat, yang memberi kesatuan kepada sifat-sifat Allah.”

Jadi dari sudut mana kita memandangi Allah, kita tidak dapat berkata dosa datang daripada-Nya.

Adam Mewakili Umat Manusia

Adamlah manusia pertama yang jatuh ke dalam dosa serta membawanya kepada umat manusia. Dosa menjalar kepada semua orang di dunia. Akibatnya, sejak kelahirannya, manusia sudah berdosa dan selalu condong berbuat dosa daripada kebenaran. “Rasul Paulus dalam Roma 5:19 berkata, “Jadi sama seperti oleh ketidaktaatan satu orang semua orang telah menjadi berdosa...” “Adam ialah bapa umat manusia, maka, kita boleh berkata dia adalah kepala yang mewakili dan bertindak bagi manusia.”⁶

Pernahkah anda mendengar pepatah, nila setitis rosak susu sebelanga? Nah, kita sekarang mengambil sebelanga susu yang segar tanpa tercemar. Keadaan ini boleh dibandingkan dengan kekudusan Adam. Sekarang, titiskan setitis nila atau dawat, kemudian mengacau susu ini dan ia akan menjadi biru. Demikian juga dengan dosa asal dari satu orang ia menular ke semua manusia. Bagai sel barah, ia merebak dengan begitu cepat.

Lahir Dalam Dosa

Agama Islam berkata manusia ketika dilahirkan, adalah bersih, seperti kertas yang belum ditulisi. Agama Buddha

pula mempercayai penderitaan (dukha) berpunca daripada keinginan (trnsna) dan kehausan (tanha). Agama Hindu pula percaya pada asalnya jiwa adalah murni dan tiada cacat cela, dan dosa disebabkan jiwa bersekutu dengan benda (prakrti), maka manusia pun tersilau.

Alkitab berkata, “Sejak lahir orang-orang fasik telah menyimpang, sejak dari kandungan pendusta-pendusta telah sesat” (Mazmur 58:4). Benarkah hal ini? Pernahkah anda melihat seorang anak kecil berdusta tanpa diajari oleh orang dewasa? Jadi bagaimana pula kita boleh berkata seseorang dilahir seperti kertas atau kain putih?

Apa Itu Dosa?

Dosa mempunyai beberapa pengertian dalam Alkitab, dan pada dasarnya ia suatu pemberontakan terhadap Allah yang Maha Kudus. Alkitab memang diwarnai oleh tema tentang dosa manusia dan rahmat Allah yang tiada batas. Dalam Perjanjian Lama khususnya dalam Imamat 16:21, tiga perkataan sering digunakan untuk menggambarkan dosa.

Permata-Permatanya

1. Penjelasan Tentang Dosa

A. Tidak Kena

Perkataan dosa yang digunakan dengan pengertian “tidak kena” atau “tidak sampai.” Ia seperti anak panah yang tidak kena pada sasarannya.

- a. Manusia dalam perkataan mahupun tingkah laku telah menyimpang dari yang diperkenan oleh Allah. Dosa seperti ini tidak selalu tampak atau dapat dilihat sebab dosa seperti ini terselindung dalam lubuk hati. Musa berkata bangsa Israel tidak sampai tahap kekudusan Allah dan jahat semata-mata. Raja Daud tahu hatinya yang seringkali tersembunyi dosa berdoa untuk pentahiran Allah. “Jadikanlah hatiku tahir, ya Allah, dan perbaharuilah batinku dengan roh yang teguh!” (Mazmur 51:12).
- b. Semua orang tidak sampai atau mencapai kekudusan Allah. “Kerana semua orang telah berbuat dosa dan telah kehilangan kemuliaan Allah” (Roma 3:23).

B. Pelanggaran

Perkataan kedua ialah derhaka atau pelanggaran terhadap perintah Allah atau kehendak-Nya. Raja Daud menyedari dia melanggar perintah Allah ketika berdosa kerana berzina. “Kasihaniilah aku, ya Allah, menurut kasih setia-Mu, hapuslah pelanggaranku menurut rahmat-Mu yang besar!” (Mazmur 51:3).

- a. Ia melibatkan melakukan sesuatu yang dilarang oleh TUHAN. “Jikalau yang berbuat dosa dengan tidak sengaja itu segenap umat Israel, dan jemaah tidak menyedarinya, sehingga mereka melakukan salah satu hal yang dilarang TUHAN, dan mereka bersalah” (Imamat 4:13).
- b. Perbuatan melanggar firman Tuhan “Kerana hukum Taurat membangkitkan murka, tetapi di mana tidak ada hukum Taurat, di sini tidak ada juga pelanggaran” (Roma 4:15). Tanya diri, berapa banyak hukum yang sudah kita langgar?

C. Kejahatan

- a. Perkataan ini mempunyai pengertian bengkok” atau “berbelit” iaitu berbengkok dari yang benar dan perintah Allah. Hal ini juga berkenaan dengan hati dan tabiat. “Celakalah mereka yang memancing kesalahan dengan tali kedustaan dan dosa seperti dengan tali gerobak” (Yesaya 5:18).
- b. Keadaan tidak berpegang kepada ketetapan-ketetapan Allah dan disesatkan oleh dosa atau dewa lain.

“Beginilah firman TUHAN: “Kerana tiga perbuatan jahat Yehuda, bahkan empat, Aku tidak akan menarik kembali keputusan-Ku. Oleh kerana mereka telah menolak hukum TUHAN, dan tidak berpegang pada ketetapan-ketetapan-Nya tetapi disesatkan oleh dewa-dewa kebohongannya yang diikuti oleh nenek moyangnya” (Amos 2:4).

D. Tiada Ber-Tuhan

Dalam Perjanjian Baru, dosa menggambarkan keadaan yang tidak ber-Tuhan dan hidup dalam kekafiran. Orang ini hidup seakan-akan Tuhan tidak wujud.

“Sebab murka Allah nyata dari syurga atas segala kefasikan dan kelaliman manusia, yang menindas kebenaran dalam kelaliman” (Roma 1:18). “Dan kerana mereka tidak merasa perlu untuk mengakui Allah, maka Allah menyerahkan mereka kepada fikiran yang terkutuk, sehingga mereka melakukan apa yang tidak pantas” (Roma 1:28).

2. Kejatuhan Manusia

Persahabatan antara Allah dan Adam serta Hawa begitu akrab; mereka berjalan bersama Allah dan bercakap dengan-Nya. Sedihnya, waktu yang indah tidak bertahan lama kerana iblis datang memisahkan mereka daripada Allah, Pencipta. Iblis datang dalam bentuk ular untuk menggoda agar mereka makan buah daripada Pohon Pengetahuan yang Baik dan Jahat. Allah berkata mereka akan mati kalau mereka memakan buah daripadanya. Iblis berkata, “Sekali-kali kamu tidak akan mati.” (Kejadian 3:4). Iblis meracuni fikiran Hawa dengan mengatakan kalau mereka memakan buah itu mereka akan menjadi seperti Allah.

Hawa mempercayai kebohongan iblis dan memakan buah itu. Hawa lupa bahawa dia dicipta untuk memuliakan Allah dalam segala tingkah laku, dan memakan buah ini bererti dia tidak setia kepada perintah Allah. Dia memberi buah itu kepada Adam dan dia memakannya juga. Alangkah sedih, Adam dan Hawa mulai menyembunyi daripada Allah. Adam menyalahkan Hawa sebab memperdayanya, dan Hawa menyalahkan ular. Mereka berdua diusir daripada Taman Eden dan Allah menempatkan kerub dengan berynala-nyala untuk menjaga pohon kehidupan.

Masalah dosa berlanjutan kepada keturunan manusia setelah nenek moyang pertama jatuh dalam dosa:

- | | |
|----|----------------------------|
| a. | Pembunuhan (Kej. 4:8, 23) |
| b. | Poligami (Kej. 4:19) |
| c. | Membalas dendam (Kej 4:24) |
| d. | Tidak bermoral (Kej. 6:2) |
| e. | Penambahan dosa (Kej. 6:5) |

Dosa yang kita warisi daripada Adam dan Hawa dipanggil dosa asal.

3. Tahap Dosa Manusia

A. Seluruhnya Berdosa

Seluruh manusia berdosa termasuk sampai ke lubuk hati dan batin yang terdalam pun, yang dalam bahasa Inggeris dipanggil “Total Depravity.”. Sekalipun manusia tidak dapat melihatnya, Allah melihat dengan jelas dan tiada yang dapat menyembunyikan dosa daripada-Nya. “Dari telapak kaki sampai kepala tidak ada yang sihat: bengkak dan bilur dan luka baru, tidak dipijit dan tidak dibalut dan tidak ditaruh minyak” (Yesaya 1:6). Manusia sudah mutlak jatuh ke dalam dosa sehingga jiwa dan badan sudah dicemari sepenuhnya.

4. Kejahatan Yang Sangat Besar

Di pandangan manusia sendiri, perbuatan jahat mereka mungkin tidak sejahat yang dianggap. Tetapi bagi TUHAN, dosa yang dilakukan manusia sungguh besar. “Ketika dilihat TUHAN, bahawa kejahatan manusia besar di bumi dan bahawa segala kecenderungan hatinya selalu membuahkan kejahatan semata-mata” (Kejadian 6:5). Hati manusia selalu membuahkan kelicikan, kemunafikan, pendustaan dan tiada yang kudus seperti Allah.

5. Semua Manusia Berdosa

Semua orang sudah berdosa kerana dosa menjalar melalui satu orang yang jatuh ke dalam dosa. “Sebab itu, sama seperti dosa telah masuk ke dalam dunia oleh satu orang, dan oleh dosa itu juga maut, demikianlah maut itu telah menjalar kepada semua orang, kerana semua orang telah berbuat dosa” (Roma 5:12).

“Semua orang telah menyeleweng, mereka semua tidak berguna, tidak ada yang berbuat baik, seorang pun tidak” (Roma 3:12). Kalau kita berkata kita tidak pernah berdosa, adakah kita yang pendusta atau Allah? “Jika kita berkata, bahawa kita tidak ada berbuat dosa, maka kita membuat Dia menjadi pendusta dan firman-Nya tidak ada di dalam kita” (1 Yohanes 1:10).

6. Dosa Berlansung Sepanjang Masa

Manusia tidak penat berdosa atau bercuti dari dosa sejak Adam jatuh ke dalam dosa. Mereka tetap mencintai diri, membelakangi Allah dan lebih banyak menuruti nafsu malah bertambah merosot:

“Manusia akan mencintai dirinya sendiri dan menjadi hamba wang. Mereka akan membuat dan menyombongkan diri, mereka akan menjadi pemfitnah, mereka akan memberontak terhadap orang tua dan tidak tahu berterima kasih, tidak mempedulikan agama, tidak tahu mengasihi, tidak mahu berdamai, suka menjelekkan orang, tidak dapat mengekang diri, garang, tidak suka yang baik, suka mengkhianat, tidak berfikir panjang, berlagak tahu, lebih menuruti nafsu daripada menuruti Allah” (2 Timotius 3:2-4).

Akibat Dosa

1. Terpisah Daripada Allah

Akibat dosa, sikap manusia pertama berubah dan mereka menyedari mereka terpisah daripada Allah. Dosa mendatangkan ketakutan sehingga mereka menyembunyikan diri daripada hadirat-Nya yang Kudus. “Kita menjadi tidak layak di hadirat

Allah. Pengusiran Adam dari Taman Eden memberi kita suatu gambaran mengenai perpindahan kita daripada Allah, tidak layak berdiri di hadirat-Nya dan menikmati kehadiran-Nya.”⁷

Dosa yang diwarisi menyebabkan manusia tidak dapat memahami hal-hal rohani. “Tetapi manusia duniawi tidak menerima apa yang berasal dari Roh Allah, kerana hal itu baginya adalah suatu kebodohan; dan dia tidak dapat memahaminya, sebab hal itu dapat hanya dinilai secara rohani” (2 Korintus 2:14).

Manusia kehilangan kemuliaan Allah yang diperoleh sewaktu ciptaan, dan gambaran Allah dalam dirinya retak. “Kerana semua orang telah berbuat dosa dan telah kehilangan kemuliaan Allah” (Roma 3:23). Calvin berkata, “walaupun gambaran Tuhan tidak dihapuskan sama sekali atau sama sekali terbinasa dalamnya, namun ia sungguh tercemar, sehingga apa yang tertinggal hanya satu kecacatan yang ngeri.”⁸

2. Kematian Rohani

Dosa menyebabkan kematian rohani. “Kamu dahulu sudah mati kerana pelanggaran-pelanggaran dan dosa-dosamu” (Efesus 2:1). Sebenarnya, pengharapan dan masa depan manusia berakhir di sini.

“Alkitab mengajar bahawa kematian ialah hukuman kekal untuk roh; roh kehilangan segala sukacita dan diceraikan daripada Allah, dan akan menerima hukuman Allah yang pasti atas dosanya sebab murka-Nya. Dosa ialah keadaan yang derhaka akibat perbuatan. Upah dosa ialah maut iaitu hukuman bagi dosa.” (Watson)

3. Manusia Diperhamba Dosa

Kejatuhan Adam dan Hawa dalam dosa membawa padah kepada manusia dan dunia ini. Manusia mulai dikuasai dan diperhamba dosa. Penghambaan dosa dijelaskan oleh Yesus seperti, "...Aku berkata kepadamu, sesungguhnya setiap orang yang berbuat dosa, adalah hamba dosa" (Yohanes 8:34). Rasul Paulus menjelaskan manusia yang berdosa sebagai yang dijual kepada dosa, "Sebab kita tahu, bahawa hukum Taurat adalah rohani, tetapi aku bersifat daging, terjual di bawah kuasa dosa" (Roma 7:14).

4. Kegelapan dan Keangkuhan

Manusia yang diperhamba dosa semakin mencintai kegelapan daripada terang Allah. Manusia bertambah angkuh dan menempatkan diri sebagai Tuan dalam hidupnya, dan mengukur kebenaran berdasarkan fikiran sendiri mengenai baik atau buruk sendiri.

- a. "Dan inilah hukuman itu: Terang telah datang ke dalam dunia, tetapi manusia lebih menyukai kegelapan daripada terang, sebab perbuatan-perbuatan mereka jahat" (Yohanes 3:19).
- b. Rasul Paulus menjelaskan manusia yang disaluti dosa sebegini, "dan pengertiannya yang gelap, jauh dari hidup persekutuan dengan Allah, kerana kebodohan yang ada di dalam mereka dan kerana kedegilan hati mereka" (Efesus 4:18)

Konflik

Konflik dari segala sudut tercetus akibat dosa; konflik dengan Allah, alam, diri sendiri dan sesama manusia bermaharaja lela.

1. Konflik Dengan Allah

J.I. Packer menggambarkan dosa dalam Alkitab seperti begini:

“Dalam pelbagai cara ia adalah pemberontakan terhadap pemilik dan raja kita yang sah; pelanggaran terhadap batas yang didirikan-Nya; yang tidak kena sasaran yang diminta-Nya; mematahkan hukum yang diletakkan-Nya; pencemaran (pengotoran, pencemaran) diri kita di hadirat-Nya, dan menjadikan diri kita tidak layak bagi persekutuan-Nya seperti merangkul kebodohan dan menutup telinga kita terhadap hikmat-Nya, dan mendatangkan rasa bersalah di depan takhta penghukuman-Nya.”⁹

2. Konflik Dengan Sendiri

Rasul Paulus melihat ada satu konflik antara manusia dan Allah:

“Tetapi di dalam anggota-anggota tubuhku aku melihat hukum lain yang berjuang melawan hukum akal budiku dan membuat aku menjadi tawanan hukum dosa yang ada di dalam anggota-anggota tubuhku” (Roma 7:23).

3. Konflik Dengan Alam

Dosa dan kejatuhan membawa konflik dengan alam yang berlawanan dengannya.

- a. “Semak duri dan rumput duri yang akan dihasilkan bagimu, dan tumbuh-tumbuhan di padang akan menjadi makananmu” (Kejadian 3:18).
- b. “Sebab kita tahu, bahawa sampai sekarang segala makhluk sama-sama mengeluh dan sama-sama merasa sakit bersalin” (Roma 8:19-23).

4. Konflik Sesama Manusia

Keretakan dalam perhubungan dengan manusia secara langsung mempengaruhi perhubungan kita dengan sesama manusia. Adam segera menunding Hawa dan menyalahkan dia atas kebodohan sendiri (Kejadian 3:12). Cerita kejatuhan manusia juga segera disusuri dengan cerita pembunuhan Habel (Kejadian 4:1-16). Manusia yang melawan Allah juga adalah manusia yang berlawan dengan sesama manusia, orang asing, musuh, keluarga sendiri dan menjadi ancaman bukan kawan terhadap sesama.

Rasul Paulus sewaktu menasihati jemaah untuk hidup sebagai anak-anak terang menyentuh tentang penghapusan konflik daripada tengah-tengah mereka. “Segala kepahitan, kegeraman, kemarahan, pertikaian dan fitnah hendaklah dibuang dari antara kamu, demikian pula segala kejahatan” (Efesus 4:31)

5. Hukuman Kekal

Dosa membawa hukuman akhirat yang pasti bagi pendosa. Hal ini tercatat banyak kali dalam Alkitab dan disebut secara khusus oleh Tuhan Yesus. Ungkapan-ungkapan berikut menggambarkan penghukuman yang akan berlansung:

“Bangkit untuk dihukum” (Yohanes 5:28,29)

Neraka (2 Petrus 2:4)

Seksaan api kekal (Yudas 7)

Lautan api yang bernyala-nyala (Wahyu 19:20)

Kematian yang kedua (Wahyu 21:8)

Api yang kekal (Matius 25:41)

Kebinasaaan selama-lamanya (2 Tesalonika 1:9)

Tempat seksaan adalah neraka yang disediakan untuk iblis dan malaikat-malaikatnya juga (Matius 25:41).

Tuhan Yesus menceritakan hal neraka dengan jelas dalam cerita Lazarus dan orang kaya dalam Lukas 16:19-31. Penjelasan-Nya dengan perincian menggambarkan penyesalan waktu neraka mencengkam.

- a. Dia masih dapat mengingat hidupnya sewaktu di dunia.
(ayat 25)
- b. Dia sungguh menyesal kerana terlambat bertaubat.
(ayat 24)
- c. Dia terseksa oleh api (ayat 24)
- d. Dia masih sayang akan adik beradiknya dan tidak mahu mereka menderita nasib yang sama seperti dia, (ayat 28)
- e. Dia melihat Lazarus hidup senang di syurga. (ayat 25)
- f. Dia memohon belas kasihan, (ayat 26)
- g. Wujud suatu jurang yang besar antara orang soleh dan orang jahat (ayat 26)
- h. Dia sudah terlambat dan terpaksa mengalami seksaan yang dahsyat sekali..

Dosa dan Saya

G.C. Berkouwer telah mengatakan bahawa kejatuhan (ke dalam dosa) tidak akan difahami dengan sepenuhnya kalau kita belum mahu mengakui penglibatan kita ke dalamnya secara peribadi dalam cerita yang sungguh dikasihani ini. Setujukah anda dengan ahli teolog ini? Fikirkan saat anda menghitam kambing orang lain sewaktu melakukan satu kesilapan.

Bagaimana pula dengan saat anda mengambil kesempatan atas orang lain? Doktrin dosa tidak akan berkesan kalau kita hanya melihatnya dari sudut teori tanpa menyelidiki lubuk hati kita. Doktrin dosa asal tidak berguna kalau kita melihat Adam dan Hawa sebagai manusia kuno yang tiada kaitan dengan kita.

Saat Berbincang

1. Mengapakah kita tidak boleh berkata dosa itu berasal daripada Allah? (Yesaya 6:3)
2. Dosa boleh difahami dari tiga pengertian dalam iman Kristian. Cari tiga kata kunci untuk menjelaskan tiga penjelasan ini.
3. Menurut agama Islam jiwa manusia ketika dilahirkan, adalah bersih, seperti kertas yang belum ditulis. Adakah pandangan ini Alkitabiah?
4. Bagaimanakah dosa mempengaruhi persahabatan manusia dengan Allah? (Kejadian 3:8)
5. Apakah yang terjadi kepada manusia dari sudut rohani? (Efesus 2:1-3)
6. Jelaskan beberapa konflik yang dialami oleh manusia akibat dosa.
7. Jelaskan masa depan orang yang tetap tinggal dalam dosa.
8. Renungkan bagaimana dosa telah menjejaskan antara negara, masyarakat anda, dalam keluarga anda, tempat kerja anda dan dalam dirimu dan hidup anda.

PELAJARAN

4

Siapa Tuhan Yesus Kristus?

Siapa Tuhan Yesus sebenarnya?

Siapakah Tuhan Yesus yang menarik orang Majus dari Timur Persia, beribuan batu jauhnya, yang melihat bintang yang besar, untuk datang ke Yerusalem menyembah-Nya? Siapa Tuhan Yesus yang dinantikan oleh Simeon dan Hana bertahun-tahun sehingga Simeon baru rela meninggalkan dunia dalam damai sejahtera kerana sudah melihat terang bagi segala bangsa. Apakah rahsianya? Siapa Yesus sehingga Yohanes Pembaptis berkata, “Membuka tali kasut-Nya pun aku tak layak.”

Tuhan Yesus yang dinubuat nabi Mikha akan dilahirkan di Betlehem memang satu rahsia yang besar! Yesus dikatakan benar-benar manusia dan juga sesungguhnya Tuhan sendiri,

yang telah diberikan kepada dunia tepat pada waktunya (Gal. 4:4). Sesungguhnya, Tuhan Yesus adalah rahsia agung ibadah kita seperti yang dikatakan oleh Rasul Paulus kepada Timotius:

“Dia, yang telah menyatakan diri-Nya dalam rupa manusia, dibenarkan dalam Roh; yang menampakkan diri-Nya kepada malaikat-malaikat, diberitakan di antara bangsa-bangsa yang tidak mengenal Allah; yang dipercayai di dalam dunia, diangkat dalam kemuliaan.” (1 Timotius 3:16)

Permata-Permata Tentang Tuhan Yesus

1. Sebelum Dunia Diciptakan, Dia Sudah Ada

Yesus Kristus bukan hanya seorang nabi, Dialah Anak Tunggal Allah Bapa, dari kekal yang dahulu sampai kekal yang akan datang.

- a. Rasul Paulus berkata, “Dia adalah gambar Allah yang tidak kelihatan, yang sulung, lebih utama dari segala yang diciptakan” (Kolose 1:15).
- b. Tuhan Yesus sendiri bersabda, “Sesungguhnya sebelum Abraham jadi, Aku telah ada” (Yohanes 8:58).
- c. Yohanes bersaksi, “Tidak ada seorang pun yang telah naik ke syurga, selain daripada Dia yang telah turun dari syurga, iaitu Anak Manusia” (Yohanes 3:13).
- d. Selain itu, Yohanes menulis Yesus sebagai firman yang datang menjadi terang., “Pada mulanya adalah Firman; Firman itu bersama-sama dengan Allah” (Yohanes 1:1)

2. Ketuhanan Yesus Kristus

Iman asas Kristian berpegang pada kenyataan bahawa Tuhan Yesus seutuhnya Tuhan dan seutuhnya manusia. Sekalipun agama Yahudi dan Islam mengakui kewujudan satu Allah, dan menghormati bapa leluhur kita seperti Abraham, dan nabi-nabi Perjanjian Lama, hanya kepercayaan orang Kristian yang mengakui ketuhanan Yesus Kristus.

- a. Yesus Kristus mendakwa dirinya sebagai Tuhan. Ketika ditanya Imam Besar sama ada Dialah Mesias dan Anak yang Terpuji. Tuhan Yesus dengan yakin dan tegas menjawab, “Akulah Dia” lalu menjelaskan, “Dan kamu akan melihat Anak manusia duduk di sebelah kanan Yang Maha Kuasa dan datang di tengah-tengah awan di langit.” (Markus 14: 62).

Tuhan Yesus berkali-kali menegaskan keilahian-Nya. “Akulah yang bersaksi tentang diri-Ku sendiri, dan juga Bapa, yang mengutus Aku, bersaksi tentang Aku” (Yohanes 8:18).

- b. Dia mendakwa Diri-Nya kekal dan sudah wujud sebelum dunia ada. “Oleh sebab itu, ya Bapa, permuliakan Aku pada-Mu sendiri dengan kemuliaan yang Kumiliki di hadirat-Mu sebelum dunia ada” (Yohanes 17:5).
- c. Dia mendakwa Diri-Nya Maha Kuasa. “Yesus mendekati mereka dan berkata: “Kepada-Ku telah diberikan segala kuasa di syurga dan di bumi” (Matius 28:18).
- d. Dia mendakwa Diri-Nya Maha Hadir. “Sebab di mana dua atau tiga orang berkumpul dalam nama-Ku, di situ Aku ada di tengah-tengah mereka” (Matius 18:20).

- e. Dia mendakwa Diri-Nya mempunyai kuasa untuk melakukan mukjizat dan menyembuh, “Tetapi Yesus mendengarnya dan berkata kepada Yairus: “Jangan takut, percaya saja, dan anakmu akan selamat” (Lukas 8:50).

Semua mukjizat-Nya memberi tanda-tanda keilahian Kristus. Tuhan Yesus hanya perlu memerintah atau menenking dan roh jahat mahupun angin taat mendengar Dia (Markus 1:27; 4:41).

- f. Tuhan Yesus mendakwa Diri-Nya berkuasa mengampuni dosa dan ini dianggap menghujat bagi ahli Taurat. “Tetapi supaya kamu tahu, bahawa di dunia Anak Manusia berkuasa mengampuni dosa”-lalu berkata Dia kepada orang lumpuh itu: “Bangunlah, angkatlah tempat tidurmu dan pulanglah ke rumahmu!” (Matius 9:6)
- g. Dia mendakwa Dia akan datang semula dan akan menjadi hakim pada kedatangan-Nya lagi. “Kata Tuhan Yesus kepada mereka: “Aku berkata kepadamu, sesungguhnya pada waktu penciptaan kembali, apabila Anak Manusia bersemayam di takhta kemuliaan-Nya, kamu, yang telah mengikut Aku, akan duduk juga di atas dua belas takhta untuk menghakimi kedua belas suku Israel” (Matius 19:28).

3. Pengetahuan Ajaib-Nya

- a. Tuhan Yesus dapat mencium bau kemunafikan setengah mereka yang mengikut-Nya. Sewaktu Dia berada di Yerusalem untuk Paskah, ada orang yang melihat Dia melakukan tanda-tanda bersama-sama Dia, namun, Dia tahu apa yang dalam hati mereka. “Tetapi Yesus

sendiri tidak mempercayakan diri-Nya kepada mereka kerana Dia mengenal mereka...sebab Dia tahu apa yang ada di dalam hati manusia” (Yohanes 2:23, 24, 25).

- b. Tuhan Yesus sudah mengenal pengkhianat-Nya awal-awal lagi, dan tahu orang itu pengikut-Nya sendiri. “Jawab Yesus kepada mereka: “Bukankah Aku sendiri yang telah memilih kamu yang dua belas ini? Namun seorang di antaramu adalah Iblis. Yang dimaksudkan-Nya ialah Yudas, anak Simon Iskariot...” (Yohanes 6:70,71)
- c. Dari mula-mulanya, Tuhan Yesus sudah mengetahui bahawa Petrus akan menyangkal Dia sebelum ayam berkokok tiga kali dan akan ditampi oleh iblis, namun akhirnya dia akan bertaubat (Lukas 22:31-34).

4. Pengajaran Ajaib-Nya

Ajaran Tuhan Yesus luarbiasa; yang mendengar kepada ajaran-Nya disentuh-Nya lalu bertaubat. Pengajaran-Nya mempunyai kuasa dan berwibawa sehingga yang mendengar tertakjub dengan cara Dia menghuraikan hukum Taurat.

- a. Dan setelah Yesus mengakhiri perkataan ini, takjublah orang banyak itu mendengar pengajaran-Nya, sebab Dia mengajar mereka sebagai orang yang berkuasa, tidak seperti ahli-ahli Taurat mereka (Matius 7:28,29).
- b. Penjaga-penjaga yang disuruh oleh imam-imam untuk membawa Tuhan Yesus kepada mereka berkata, “Belum pernah seorang manusia berkata seperti orang itu” (Yohanes 3:46).

- c. Penggunaan perumpamaan-Nya mengisahkan bahawa Dia mengenal manusia dengan begitu terperinci. Dalam Matius 13:3-19 Dia membandingkan keadaan hati manusia yang berlainan dengan beberapa jenis tanah.

5. Nama Yahweh atau Yehova

Yahweh atau Yehova dalam Perjanjian Lama diterjemahkan dalam Yunani sebagai Kyrios (Lord) atau Tuhan. Nama ini diberikan kepada Yesus Kristus; Dia dipanggil sebagai Tuhan Yesus Kristus. Pengakuan Yesus Kristus sebagai “Tuhan” merupakan pengakuan iman yang paling awal.

- a. Apabila Tuhan Yesus bangkit dan ditinggikan, “dan segala lidah mengaku: “Yesus Kristus adalah Tuhan,” bagi kemuliaan Allah, Bapa!” (Filipi 1:11)
- b. Rasul Paulus mengatakan jika kita mengaku Yesus Kristus sebagai Tuhan kita akan diselamatkan, “Sebab jika kamu mengaku dengan mulutmu, bahawa Yesus adalah Tuhan, dan percaya dalam hatimu, bahawa Allah telah membangkitkan Dia dari antara orang mati, maka kamu akan diselamatkan” (Roma 10:9).
- c.. Rasul Paulus hanya memberitakan Yesus Kristus, Tuhan-nya. “Sebab bukan diri kami yang kami beritakan, tetapi Yesus Kristus sebagai Tuhan, dan diri kami sebagai hamba kerana kehendak Yesus” (2 Korintus 4:5).

6. Beberapa Istilah Lain

Beberapa istilah yang sering digunakan oleh Tuhan Yesus ada kaitan dengan identiti Allah dalam Perjanjian Lama.

a. Aku Adalah

Sewaktu Musa bertanya bagaimana dia harus menjelaskan nama-Nya kepada umat-Nya, jawaban Allah sungguh luar-biasa.

“Firman Allah kepada Musa: “AKU ADALAH AKU.” Lagi firman-Nya: “Beginilah kau katakan kepada orang Israel itu: AKULAH AKU telah mengutus aku kepadamu” (Keluaran 3:14).

Sehubungan ini, Tuhan Yesus sering menggunakan Akulah... untuk menjelaskan Diri-Nya. Contohnya, “Akulah terang dunia...” (Yohanes 8:12); “Akulah gembala yang baik...” (Yohanes 10:11); “Akulah pokok anggur...” (Yohanes 15:5).

b. Mempelai

Nabi Yesaya menjelaskan penyelamatan Allah yang akan datang ke atas Sion sebagai mempelai yang segera datang untuk pengantin wanita. “...demikianlah Dia yang membangun engkau akan menjadi suamimu, dan seperti girang hatinya seorang mempelai melihat pengantin perempuan, demikianlah Allahmu akan girang hati atasmu” (Yesaya 62:5).

Sehubungan ini, Yesus sering menggunakan mempelai untuk merujuk kepada Diri-Nya. ”Jawab Yesus kepada mereka: “Dapatkah sahabat-sahabat mempelai laki-laki berpuasa sedang mempelai itu bersama mereka? Selama mempelai itu diambil daripada mereka, dan pada waktu itulah mereka akan berpuasa” (Markus 2:19)

c. Gembala

Yehezkiel berfirman bahawa raja-raja jahat bagi gembala-gembala yang jahat yang hanya makan domba, dan bukan menjaga mereka. Di tengah-tengah firman Tuhan tentang keburukan gembala-gembala ini, terselip satu nubuat tentang Gembala Baik, iaitu Mesias. “Aku sendiri akan menggembalakan domba-domba-Ku dan Aku akan membiarkan mereka berbaring, demikianlah firman Tuhan Allah” (Yehezkiel 34:15).

Sehubungan ini, Tuhan Yesus mengakui Diri-Nya Gembala Baik yang memberi nyawa-Nya bagi domba-Nya. “Akulah gembala yang baik. Gembala yang baik memberikan nyawanya bagi domba-domba” (Yohanes 10:11).

7. Domba Allah

Dalam Keluaran 12, domba paskah telah disembelih; konsep ini digunakan dalam Perjanjian Baru oleh Yohanes Pembaptis tentang Yesus.

Sewaktu Tuhan Yesus dibaptis, Yohanes Pembaptis berkata, “Pada keesokan harinya Yohanes melihat Yesus datang kepadanya dan dia berkata: “Lihatlah Anak Domba Allah, yang menghapus dosa dunia” (Yohanes 1:29).

Yohanes di pulau Patmos, “Dan mereka mengalahkan dia oleh darah Anak Domba, dan oleh perkataan kesaksian mereka. Kerana mereka tidak mengasihi nyawa mereka sampai ke dalam maut” (Wahyu 12:11).

8. Kemanusiaan Yesus Kristus

Kemanusiaan Yesus Kristus sepenting keilahian-Nya sebab seandainya Dia bukan manusia seutuhnya, Dia tidak dapat menjadi korban dosa atau Penebus bagi manusia. Tuhan Yesus mengambil rupa manusia sama seperti kita namun Dia tidak mewarisi dosa Adam. Tuhan Yesus mempunyai darah dan daging seperti manusia:

“Kerana anak-anak itu adalah anak-anak daripada darah dan daging. Maka Dia juga menjadi sama dengan mereka dan mendapat bahagian dalam keadaan mereka, supaya oleh kematian-Nya Dia memusnahkan Dia, iaitu Iblis, yang berkuasa atas maut” (Ibrani 2:14).

Orang yang tidak mengakui Yesus Kristus berasal daripada Allah dan manusia dicamkan sebagai antikristus:

“Demikianlah kita mengenal Roh Allah: setiap roh yang mengaku bahawa Yesus Kristus telah datang sebagai manusia berasal daripada Allah, dan setiap roh yang tidak mengaku Yesus, tidak berasal daripada Allah. Roh itu adalah roh antikristus dan tentang dia telah kamu dengar, bahawa dia akan datang dan sekarang ini ia sudah ada di dalam dunia” (1 Yohanes 4:2-3).

9. Beberapa Aspek Kemanusiaan Yesus

Sebagai manusia, Tuhan Yesus mengalami seperti yang dialami oleh manusia:-

Siapa Tuhan Yesus Kristus?

- a. Tuhan Yesus pernah menjadi bayi dan membesar. “Sesungguhnya engkau akan mengandung dan akan melahirkan seorang anak laki-laki dan hendaklah engkau menamai Dia Yesus” (Lukas 1:31).
- b. Dia bertumbuh besar dengan penuh hikmat. “Dan Yesus makin bertambah besar dan bertambah hikmat-Nya dan besar-Nya, dan makin dikasihi oleh Allah dan manusia” (Lukas 2:52).
- c. Tuhan Yesus pernah mengalami kelelahan mungkin keterikan hari. “Di situ terdapat sumur Yakub, Yesus sangat letih oleh perjalanan, kerana itu Dia duduk di pinggir sumur itu. Hari kira-kira pukul dua belas” (Yohanes 4:6).
- d. Tuhan Yesus terharu dengan kesedihan kawan-kawan-Nya Maria dan Marta, dan hati-Nya masygul. “Ketika Yesus melihat Maria menangis dan juga orang-orang Yahudi yang datang bersama-sama dia, maka masygullah hati-Nya...” (Yohanes 11:33).
- e. Tuhan Yesus sewaktu di dunia ini juga lapar. “Pada pagi-pagi hari dalam perjalanan-Nya kembali ke kota, Yesus merasa lapar” (Matius 21:18).
- f. Ketika angin rebut mengamuk, Tuhan Yesus tertidur nyenyak di perahu mungkin terlalu lelah! “Sekonyong-konyong mengamuklah angin ribut di danau itu, sehingga perahu itu ditimbus gelombang, tetapi Yesus tidur” (Matius 8:24).

- g. Tuhan Yesus mati di kayu salib. “Lalu Yesus berseru dengan suara nyaring: “Ya Bapa, ke dalam tangan-Mu Kuserahkan nyawa-Ku.” Dan sesudah berkata demikian Dia menyerahkan nyawa-Nya” (Lukas 23:46).
- h. Namun, sebagai manusia dia tidak mewarisi dosa dan tidak pernah berdosa. “Sebab Imam Besar yang demikianlah yang kita perlukan: iaitu yang salih, tanpa salah, tanpa noda, yang terpisah daripada orang-orang berdosa dan lebih tinggi daripada tingkat-tingkat syurga” (Ibrani 7:26).

Sebagai manusia, Tuhan Yesus dapat memahami segala kelemahan dan ujian yang dialami oleh manusia. “Kerana kita sekarang mempunyai Imam Besar Agung, yang telah melintasi semua langit, iaitu Yesus, Anak Allah, baiklah kita teguh berpegang pada pengakuan iman kita” (Ibrani 4:14).

10. Keistimewaan Sifat-Nya

Tuhan Yesus bukan manusia biasa-biasa, tetapi apabila kita membaca kisah gerak geri-Nya dalam Injil, tiada setanding-Nya.

- a. Keberanian yang tidak bergoyah contohnya Dia mengarahkan pandangan-Nya untuk ke Yerusalem di mana Dia akan menderita dan mati (Lukas 9:51).
- b. Dia tidak takut bercakap kebenaran setiap situasi sekalipun itu Pilatus. Apabila ditanya oleh imam besar tentang ajaran-Nya, Yesus berkata dia bukan jenis yang berbicara tersembunyi-semunyi tetapi terang-terang kepada dunia (Yohanes 18:20).

- c. Sebagai manusia, Tuhan Yesus juga bertahan lasak, dan berjalan dari satu tempat ke tempat lain untuk menyampaikan Kerajaan Allah.
- d. Tuhan Yesus tahu bila untuk berdiam. Kadangkala kita lebih banyak bercakap dan tidak tahu bila kita patut berdiam. Herodes mengajukan banyak pertanyaan kepada Yesus tetapi Yesus tidak memberi jawapan apa pun (Lukas 23:9).
- e. Dia sungguh tegas apabila keadaan memerlukan ketegasan-Nya. Tuhan Yesus mengusir mereka yang menjadikan Bait Allah sarang penyamun. Dia berseru tanpa ragu-ragu, “Rumahku adalah rumah doa. Tetapi kamu menjadikannya sarang penyamun” (Lukas 19:46).
- f. Tuhan Yesus tidak bertopeng tetapi berterus terang dengan manusia yang perlu ditegur. Para Farisi yang pandai berpura-pura, ditegur, “Celakalah kamu, hai ahli-ahli Taurat dan orang Farisi, hai kamu orang munafik, sebab persepuluhan dari selasih, adas manis dan jintan kamu bayar, tetapi yang terpenting dalam hukum Taurat kamu abaikan, iaitu keadilan dan belas kasihan dan kesetiaan. Yang satu harus dilakukan dan yang lain jangan abaikan” (Matius 23:23).

11. Yang Dikatakan Orang Lain

- a. Isteri Pilatus menasihati suaminya Pilatus agar jangan berbuat salah dengan menjatuhkan hukuman kepada Tuhan Yesus yang benar. Dia memanggil Yesus sebagai, “Orang yang benar itu” (Matius 27:4).

- b. Yudas, pengikut yang mengkhianati Dia dengan menyesal mengakui, “Aku telah berdosa kerana menyerahkan darah orang yang tidak berdosa” (Matius 27:4)
- c. Pencuri yang akan mati pada hari Tuhan Yesus disalibkan pun bersaksi, “Orang ini tidak berbuat sesuatu yang bersalah” (Lukas 23:41).
- d. Askar-askar Rom yang terlibat dalam penyaliban Tuhan Yesus terharu dengan kesaksian sehingga dia berseru, “Sungguh, orang ini orang yang baik!” (Lukas 23:47).
- e. Petrus pengikutnya yang pernah menyangkal Dia tiga kali namun kemudian menjadi pengikut setia kemudian bersaksi tentang kesucian Yesus. “Dia tidak berbuat dosa dan bibir-Nya tidak pernah mengucap kesalahan (1 Petrus 2:27).

Tuhan Yesus dan Saya

F.F. Bruce pakar Perjanjian Baru berkata, “Firman yang disabda-Nya, pekerjaan yang dilakukan-Nya, kehidupan yang dijalani-Nya, sifat-Nya, semuanya menggambarkan gambaran Bapa yang tidak kelihatan. Tuhan Yesus persis seperti yang dikatakan oleh rasul Paulus, “Dia gambar Allah yang tidak kelihatan.” Dengan segenap jiwa, sembahlah Dia yang menjadi mahkota hati kita.


Saat Berbincang

1. Apakah perbezaan dengan Kristus dan manusia lain yang pernah tinggal di tengah-tengah manusia? (Yohanes 1:14)
2. Siapakah Firman yang disebutkan dalam Yohanes 1:1?
3. Apakah yang dikatakan oleh Tuhan Yesus yang menunjukkan bahawa Dia mempunyai sifat ilahi? (Matius 9:6)
4. Bagaimanakah ayat ini memberitahu kita bahawa Yesus mendakwa Diri-Nya sebagai Tuhan? (Matius 19:28)
5. Apakah yang anda boleh rumuskan tentang Diri Tuhan Yesus? (Markus 1:27)
6. Mengapakah sifat kemanusiaan Tuhan Yesus begitu penting? (Ibrani 4:15)
7. Baca Matius 23:25-26, jelaskan sifat yang anda sukai mengenai Dia.

PELAJARAN

5

Penjelmaan Tuhan Yesus



Banyak nubuat Perjanjian Lama telah bersabda bahawa seorang Mesias akan datang. Penjelmaan bererti mengambil rupa tubuh manusia yang sesungguhnya. Mengapakah Yesus menjelmat sebagai manusia? “Alkitab, hampir dalam setiap rujukan kepada penjelmaan, menyebutnya dalam rangka penebusan sebagai tujuannya. Untuk menjadi “Adam terakhir” dan Kepala perjanjian bagi bangsa baru dan umat yang tertebus, Tuhan kita mesti mengambil bentuk tubuh yang hampir seperti tubuh kita, dan sebagai Manusia memberi ketaatan muktamad terhadap segala tuntutan ilahi.”¹⁰

Kelahiran ajaib,
O Anak yang Indah
Dilahirkan Perawan Suci
Sekalipun ditolak dunia
Tetap dimahkotai di syurga
(Ambrose dari Milan)

Rahsia dan Permata Terindah

Penjelmaan Yesus bererti kerelaan-Nya untuk merendahkan diri, mengambil rupa manusia, dan inilah rahsia iman Kristian yang terbesar! “Yang walaupun dalam rupa Allah, tidak menganggap kesetaraan dengan Allah itu sebagai milik yang harus dipertahankan, melainkan telah mengosongkan diri-Nya sendiri, dan mengambil rupa seorang hamba, dan menjadi sama dengan manusia” (Filipi 2:6,7).

Satu hal yang perlu kita jelas ialah yang menjelma bukan Allah Tritunggal tetapi Peribadi yang kedua dalam Tritunggal. Dengan demikian, menurut Louis Berkhof, ada baiknya kita berkata firman telah menjadi manusia daripada

Allah menjadi manusia.¹¹ Kebenaran ini memang terbukti dalam firman Tuhan, “Firman itu telah menjadi manusia, dan diam di antara kita, dan kita telah melihat kemuliaan-Nya, iaitu kemuliaan yang diberikan kepada-Nya sebagai Anak Tunggal Bapa, penuh kasih karunia dan kebenaran” (Yohanes 1:14).

Mukjizat Terbesar

Rahsia kedua yang menakjubkan manusia tentang penjelmaan Tuhan Yesus adalah kelahiran-Nya oleh seorang perawan.

“Tetapi ketika dia mempertimbangkan maksud itu, malaikat Tuhan nampak kepadanya dalam mimpi dan berkata: “Yusuf, anak Daud, janganlah engkau takut mengambil Maria sebagai isterimu, sebab anak yang di dalam kandungannya adalah daripada Roh Kudus. Dia akan melahirkan anak laki-laki dan engkau akan menamakan Dia Yesus, kerana Dialah yang akan menyelamatkan umat-Nya dari dosa mereka” (Matius 1:20-21).

Permata-Permata Penjelmaan Yesus

1. Penjelmaan-Nya Dalam Nubuat

- a. Sejurus setelah manusia jatuh dalam dosa, Allah sendiri menjanjikan Mesias yang akan datang bagi manusia. “Aku akan mengadakan permusuhan antara engkau dan perempuan ini, antara keturunanmu dan rumahnya; keturunannya akan meremukkan kepadamu, dan engkau akan meremukkan tumitnya” (Kejadian 3:15).

- b. Nabi Yesaya menjelaskan sifat Mesias yang akan diijelmakan sebagai Tuhan dan manusia. “Sebab seorang anak telah lahir untuk kita, seorang putera telah diberikan untuk kita; lambang pemerintahan ada di atas bahunya, dan namanya disebutkan orang: Penasihat Ajaib, Allah yang Perkasa, Bapa Kekal, Raja Damai” (Yesaya 9:5).
- c. Kitab Mazmur bernubuat tentang kedatangan Mesias sebagai Tuhan dan manusia. “Akulah yang telah melantik raja-Ku di Sion, gunung-Ku yang kudus! Aku mahu menceritakan tentang ketetapan TUHAN; Dia berkata kepadaku: “Anak-Ku engkau! Engkau telah Kuperanakan pada hari ini” (Mazmur 2:6, 7).
- d. Betlehem, kota terkecil, dinubuatkan Mikha akan menjadi tempat kelahiran Mesias. “Tetapi engkau, hai Betlehem Efrata, hai yang terkecil di antara kaum-kaum Yehuda, daripadamu akan bangkit bagi-Ku seorang yang akan memerintah Israel, yang permulaannya sudah sejak purbakala, sejak dahulu kala” (Mikha 5:1).
- e. Mesias sebagai Hamba Yang Menderita menjadi nubuat Yesaya yang penting. “Tetapi dia tertikam oleh kerana pemberontakan kita, dia diremukkan oleh kerana kejahatan kita, ganjaran yang mendatangkan penyelamatan bagi kita ditimpakan kepadanya, dan oleh bilur-bilurnya kita menjadi sembuh” (Yesaya 53:5).
- f. Yesus akan mengendarai seekor keledai dinubuatkan nabi Zakharia. “Bersorak-soraklah dengan nyaring, hai puteri Sion, bersorak-sorailah, hai puteri Yerusalem! Lihat rajamu datang kepadamu; dia adil dan jaya. Dia

lemah lembut dan mengendarai seekor keledai beban yang muda” (Zakharia 10:9). Nubuat ini digenapi oleh Tuhan Yesus sewaktu dia mengendarai keledai ke Yerusalem (Yohanes 12:15)

2. Pemberian Indah Genap Waktunya

- a. Penjelmaan Tuhan Yesus merupakan pemberian yang terindah daripada Allah Bapa, “Kerana begitu besar kasih Allah akan dunia ini, sehingga Dia telah mengaruniakan Anak-Nya yang tunggal, supaya setiap orang yang percaya kepada-Nya tidak binasa, melainkan beroleh hidup yang kekal” (Yohanes 3:16).
- b. Rasul Paulus berkata genap waktu-Nya, Allah mengutus Anak-Nya untuk menebus kita dari dosa. “Tetapi setelah genap waktunya, maka Allah mengutus Anak-Nya, yang lahir daripada seorang perempuan dan takluk kepada hokum Taurat. Dia diutus untuk menebeus mereka, yang takluk kepada hokum Taurat, supaya kita diterima menjadi anak” (Galatia 4:4,5).

3. Jati Keilahian Yang Penuh

- a. Penjelmaan Tuhan Yesus tidak mengurangi jati keilahian-Nya kerana dalam Dia diamlah segala kepenuhan Allah. “Sebab dalam Dialah berdiam secara jasmaniah seluruh kepenuhan ke-Allahan” (Kolose 2:9).
- b. Dalam Diri Tuhan Yesus, kita tetap melihat kemuliaan-Nya walaupun Dia menjelma sebagai manusia. “Firman itu telah menjadi manusia, dan diam di antara kita, dan kita telah melihat kemuliaan-Nya iaitu kemuliaan

yang diberikan kepada-Nya sebagai Anak Tunggal Bapa, penuh kasih karunia dan kebenaran” (Yohanes 1:14).

4. Penyelamatan Manusia

- a. Tujuan yang terpenting penjelmaan Tuhan Yesus ialah untuk menyelamatkan umat manusia dari dosa. Dalam Lukas 2:11, malaikat-malaikat dengan bahagia memberitakan tentang kelahiran Juruselamat atau Penyelamat Dunia. “Hari ini telah lahir bagimu Juruselamat, iaitu Kristus, Tuhan, di kota Daud” (Lukas 2:11).

Kedatangannya bukan hanya untuk bangsa Israel sahaja tetapi untuk sedunia. “Dan kami telah melihat dan bersaksi, bahawa Bapa telah mengutus Anak-Nya menjadi Juruselamat dunia” (1 Yohanes 4:14).

- b. Tuhan Yesus mendamaikan manusia kepada Allah. “Juga kamu yang dahulu hidup jauh daripada Allah dan yang memusuhi-Nya dalam hati dan fikiran seperti nyata daripada perbuatmu yang jahat, sekarang diperdamaikan-Nya, di dalam tubuh jasmani Kristus oleh kematian-Nya, untuk menempatkan kamu kudus dan tak bercela dan tak bercacat di hadapan-Nya” (Kolose 1:21,22).
- c. Manusia kini berani menghadap hadirat-Nya dengan berani sebab mereka ditebus oleh darah Kristus. “Jadi, saudara-saudara, oleh darah Yesus kita sekarang penuh keberanian dapat masuk ke dalam tempat kudus” (Ibrani 10:19).

- d. Penjelmaan dan kematian Yesus mengalahkan Iblis, dan kini manusia dibebaskan daripada perhambaan. Maut juga dihapuskan-Nya. “Kerana anak-anak itu adalah anak-anak daripada darah dan daging, maka Dia jua menjadi sama dengan mereka dan mendapat bahagian dalam keadaan mereka, supaya oleh kematian-Nya Dia memusnahkan dia, iaitu Iblis, yang berkuasa atas maut” (Ibrani 2:14).

- e. Dengan karya penyelamatan-Nya, Tuhan Yesus membuka jalan bagi kita untuk mengambil bahagian dalam kudrat ilahi-Nya serta memampukan kita untuk meninggalkan hawa nafsu duniawi. “Dengan jalan itu Dia telah menganugerahkan kepada kita janji-janji yang berharga dan yang sangat besar, supaya olehnya kamu boleh mengambil bagian dalam kudrat ilahi, dan luput dari hawa nafsu duniawi yang membinasakan dunia” (2 Petrus 1:4).

5. Kekudusan Tuhan Yesus

Tuhan Yesus kudus seentuhnya dan tiada dosa. Rasul Paulus sewaktu mengutip Mazmur 2:1-2 merujuk kepada Tuhan Yesus sebagai Hamba-Mu yang kudus.

“Raja-raja dunia bersiap-siap dan para pembesar berkumpul untuk melawan Tuhan dan Yang Diurapi-Nya. Sebab sesungguhnya telah berkumpul di dalam kota ini Herodes and Pontius Pilatus berserta bangsa-bangsa dan suku-suku bangsa Israel melawan Yesus, Hamba-Mu yang kudus, yang Engkau urapi” (Kisah Para Rasul 4:26-27).

Yohanes juga menyatakan kekudusan Tuhan Yesus sebagai yang patut diteladani pengikut-Nya. “Setiap orang yang menaruh pengharapan itu kepada-Nya, menyucikan diri sama seperti Dia adalah suci” (1 Yohanes 3:3).

6. Bagaimana Kekudusan-Nya Dinyatakan?

- a. Tuhan Yesus selalu menurut Bapa-Nya dengan taat.

“Dan Dia, yang telah mengutus Aku, Dia menyertai Aku, Dia tidak membiarkan Aku sendiri, sebab Aku sentiasa berbuat apa yang berkenan kepada-Nya” (Yohanes 8:29).

Allah Bapa pun sangat berkenan dengan Tuhan Yesus yang selalu taat dan hidup kudus.

“Dan tiba-tiba sedang Dia berkata-kata turun awan yang terang menaungi mereka dan dari dalam awan itu terdengar suara yang berkata: “Inilah Anak yang Kukasihi, kepada-Nyalah Aku berkenan, dengarkanlah Dia” (Matius 17:5),

- b. Tuhan Yesus pernah diuji oleh Iblis di padang gurun dengan dahsyat. Iblis yang berfikir ia dapat mengambil kesempatan atas keletihan dan kelaparan Tuhan Yesus gagal menewaskan-Nya Lalu Iblis meninggalkan Dia, dan lihatlah, malaikat-malaikat datang melayani Yesus” (Matius 4:11). Kita mempunyai imam yang pernah diuji. “Sebab Imam Besar yang kita punya, bukanlah imam besar yang tidak dapat turut merasakan kelemahan-kelemahan kita, sebaliknya sama dengan kita, Dia telah dicubai, hanya tidak berbuat dosa” (Ibrani 4:15).

- c. Pada saat Tuhan Yesus mengalami kesakitan yang paling tenat pun Dia tidak berdosa. Tiada ejekan mahupun penghinaan boleh menyebabkan Tuhan Yesus mengutuk mereka. Sebaliknya, Tuhan Yesus dengan penuh kasih mengampuni mereka. Yesus berkata, “Ya Bapa, ampunilah mereka, sebab mereka tidak tahu apa yang mereka perbuat.” Dan mereka membuang undi untuk membagi pakaian-Nya” (Lukas 23:34).

7. Jabatan-Jabatan Tuhan Yesus

Tiga jabatan telah dipenuhi oleh Tuhan Yesus sebagai pengantara kita: Nabi, Imam dan Raja.

A. Nabi Yang Sendiri Firman Itu

Nabi adalah penyambung lidah bagi firman-Nya untuk membawa umat Tuhan kembali kepada-Nya. Allah mengutus Musa dan Harun demi tujuan ini. Musa yang berat lidah akan ditolong oleh Harun. “Dia harus berbicara bagimu kepada bangsa itu, dengan demikian Dia akan menjadi penyambung lidahmu dan engkau akan menjadi seperti Allah baginya” (Keluaran 4:16)..

- a. Tuhan Yesus memenuhi tugas kenabian jauh melampaui daripada nabi biasa. Seorang nabi memberitakan Firman Allah yang diwahyukan kepadanya, tetapi Tuhan Yesus adalah kebenaran dan Firman itu, yang sejak mula sudah berada bersama dengan Bapa-Nya. Dia sendiri adalah firman Allah! “Pada mulanya adalah Firman; Firman itu bersama-sama dengan Allah dan Firman itu adalah Allah” (Yohanes 1:1).

- b. “Setelah pada zaman dahulu Allah berulang kali dan dalam pelbagai cara berbicara kepada nenek moyang kita dengan perantaraan nabi-nabi, maka pada zaman akhir ini Dia telah berbicara kepada kita dengan perantaraan Anak-Nya, yang telah Dia tetapkan sebagai yang berhak menerima segala yang ada. Oleh Dia Allah telah menjadikan alam semesta” (Ibrani 1:1,2). Peranan kenabian Tuhan Yesus melampaui nabi-nabi biasa bahkan Dialah pusat segala ajaran yang disampaikan oleh para nabi.

B. Imam Sempurna

- a. Mazmur 110 memberi banyak wawasan tentang Tuhan Yesus sebagai Imam, dan jabatan Imam ini jauh lebih tinggi daripada semua imam biasa. Dia akan menjadi imam untuk selama-lamanya, “TUHAN telah bersumpah, dan Dia tidak akan menyesal: “Engkau adalah imam untuk selama-lamanya, menurut Melkisedek” (Mazmur 110:4; Ibrani 5:6).
- b. “Kerana kita sekarang mempunyai Imam Besar Agung, yang telah melintasi semua langit, iaitu Yesus, Anak Allah, baiklah kita teguh berpegang pada pengakuan iman kita” (Ibrani 4:14).
- c. Imam Besar ini membawa darah sendiri dan hanya perlu mempersembahkan korban sekali untuk selama-lamanya. “Dan Dia telah masuk satu kali untuk selama-lamanya ke dalam tempat yang kudus bukan dengan membawa darah domba jantan dan darah anak lembu tetapi dengan membawa darah sendiri. Dan dengan itu Dia telah mendapat kelepasan yang kekal” (Ibrani 9:12).

- d. Pengorbanan yang dilakukan oleh Tuhan Yesus sebagai Imam Besar jauh melampaui imam-imam besar lain. Dia tidak perlu melakukan korban bagi diri sendiri sebelum Dia membuat korban bagi orang lain kerana Dia Maha Kudus bahkan Dia korban yang tiada cacat cela.

“Kerana itu Dia sanggup juga menyelamatkan dengan sempurna semua orang yang oleh Dia datang kepada Allah. Sebab Dia hidup senantiasa untuk menjadi Pengantara mereka. Sebab Imam Besar yang demikianlah yang kita perlukan iaitu yang salih, tanpa salah, tanpa noda, yang terpisah dari orang-orang berdosa dan lebih tinggi daripada tingkat-tingkat syurga” (Ibrani 7:25,26).

- e. Tidak seperti imam-imam lain, Dia hanya perlu melakukan korban sekali sahaja. “Yang tidak seperti imam-imam besar lain, yang setiap hari harus mempersembahkan korban untuk dosanya sendiri dan sesudah itu barulah untuk dosa umatnya, sebab hal itu telah dilakukan-Nya sekali untuk selama-lamanya, ketika Dia mempersembahkan diri-Nya sendiri sebagai korban” (Ibrani 7:27).

C. Raja Yang Bekerajaan Kekal

Menurut Pemazmur, Mesias yang berjabatan sebagai imam akan memerintah sebagai Raja selama-lamanya (Mazmur 110:1-3). Kitab Daniel bernubuat Raja Mesias ini. Dalam penglihatan dan nubuatnya Daniel bernubuat tentang pemerintahan yang berlangsung selama-lamanya:

“Lalu diberikan kepadanya kekuasaan dan kemuliaan dan kekuasaan sebagai raja, maka orang-orang dari segala bangsa, suku bangsa, suku bangsa dan bahasa mengabdikan kepadanya. Kekuasaannya ialah kekuasaan yang kekal, yang tidak akan lenyap, dan kerajaannya ialah kerajaan yang tidak akan musnah” (Daniel 7:14).

Sewaktu Tuhan Yesus dilahirkan, malaikat berkata kepada Maria bahawa Dia akan menjadi raja daripada keturunan Yakub sampai selama-lamanya, dan bahawa kerajaan-Nya tiada berkesudahan. “Dia akan menjadi besar dan akan disebut Anak Allah yang Maha Tinggi. Dan Tuhan Allah akan mengaruniakan kepada-Nya takhta Daud, bapa leluhur-Nya, dan Dia akan menjadi raja atas keturunan Yakub sampai selama-lamanya dan Kerajaan-Nya tidak akan berkesudahan” (Lukas 1:32,33).

Juga, Tuhan Yesus berada dalam pelayanan, Dia sering menegaskan bahawa kerajaan-Nya bukan dunia ini. Jawab Yesus: “Kerajaan-Ku bukan dari dunia ini; jika Kerajaan-Ku dari dunia ini, pasti hamba-hamba-Ku telah melawan, supaya Aku jangan diserahkan kepada orang Yahudi, akan tetapi Kerajaan-Ku bukan dari sini” (Yohanes 18:36).

Penjelmaan Tuhan Yesus dan Saya

Semua Syukur bagi Kau, Tuhan Kekal

Yang berjubah daging dan darah

Yang memilih palungan bagi takhta-Mu

Sedangkan dunia, segala dunia milik Kau (Martin Luther)

Saat Berbincang

1. Bagi anda, apakah yang terindah mengenai penjelmaan Tuhan Yesus? (Filipi 2:5-8).
2. Mengapakah kelahiran Tuhan Yesus sungguh berbeza daripada kelahiran yang lain? (Matius 1:20)
3. Sejak bilakah Tuhan Yesus sudah berada sebelum Dia dijelmakan? (Yohanes 1:1-4).
4. Apakah yang dinyatakan oleh nubuat ini mengenai tujuan penjelmaan Tuhan Yesus? (Yesaya 53:5).
5. Apakah yang dilakukan oleh Tuhan Yesus untuk kita dengan karya penebusan-Nya? (2 Petrus 1:4)
6. Mengapakah kini kita dapat masuk ke dalam hadirat-Nya dengan berani? (Ibrani 10:19).
7. Apakah tiga jabatan yang dijabat oleh Tuhan Yesus Kristus? Bincang dengan kawan awak apa erti salah satu jabatan bagi anda secara peribadi.

PELAJARAN

6

Kayu Salib



Kayu Salib merupakan inti Injil yang diberitakan oleh Rasul Paulus. Dia menulis kepada gereja Korintus, “Sebab aku telah memutuskan untuk tidak mengetahui apa-apa di antara kamu selain Yesus Kristus, yaitu Dia yang disalibkan”(1 Korintus 2:2). “Tetapi aku sekali-kali tidak mahu bermegah, selain dalam salib Tuhan kita Yesus Kristus, sebab olehnya dunia telah disalibkan bagiku dan aku bagi dunia” (Galatia 6:14). Semua kayu salib merupakan lambang penghinaan, dan hanya satu kayu salib menggambarkan kemuliaan dan kasih Allah yang mengutus Anak-Nya, yang rela datang demi tujuan penyelamatan manusia.

“Di atas salib Yesus
Mataku menatap
Bentuk seorang yang mati
Yang menderita bagiku
Dan daripada hatiku yang terharu
Dengan airmata
Dua keajaiban kuseru pada bibir
Kasih-Nya yang mulia
Ketidaklayakan aku.” (Elizabeth Cecilia Clephane, 1830-69)

Permata-Permata Kayu Salib

1. Kayu Salib Rencana Allah

Kayu salib bukan rancangan manusia tetapi rancangan Allah yang sudah dinubuat jauh-jauh hari. Kayu salib memang kesengsaraan hebat, namun justru untuk saat inilah tujuan kedatangan-Nya yang pertama kali. “Sekarang jiwa-Ku terharu dan apakah yang akan kukatakan? Bapa selamatkanlah Aku dari saat ini? Tidak, sebab untuk itulah Aku datang dalam saat ini” (Yohanes 12:27). Tuhan Yesus juga berkata kepada para

murid-Nya, “Dengarlah dan camkanlah segala perkataan-Ku ini: Anak manusia akan diserahkan ke dalam tangan manusia” (Lukas 9:44).

Kematian Yesus dan penggenapan rancangan Allah menjadi pokok perbincangan Elia dan Musa sewaktu mereka berada di Gunung Pemuliaan. “Dan tampaklah dua orang berbicara dengan Dia, iaitu Musa dan Elia. Keduanya menampakkan diri dalam kemuliaan dan berbicara tentang tujuan kepergian-Nya yang akan digenapi di Yerusalem” (Lukas 9:30, 31).

Pengorbanan Tuhan Yesus sudah dilambangkan oleh korban penyembelihan sejak Perjanjian Lama. Pengorbanan domba dalam Perjanjian Lama itu suatu gambaran untuk rancangan yang terindah. “Sebab Kristus bukan masuk ke dalam tempat kudus buatan manusia yang hanya merupakan gambaran saja dari yang sebenarnya, tetapi ke dalam syurga sendiri untuk menghadap hadirat Allah guna kepentingan kita” (Ibrani 9:24).

Lambang domba Paskah juga gambaran Domba Paskah, Yesus Kristus. “Lalu Musa memanggil semua tua-tua serta berkata kepada mereka: “Pergilah, ambillah kambing domba untuk kaummu dan sembelihlah anak domba Paskah” (Keluaran 12:21). Rasul Paulus pun menyebutkan Tuhan Yesus sebagai anak domba Paskah yang disembelih, “Sebab anak domba Paskah kita juga telah disembelih iaitu Kristus” (1 Korintus 5:7).

2. Tujuan Kematian Tuhan Yesus

Tuhan Yesus mati kerana dosa manusia bukan dosa sendiri melainkan dosa seluruh dunia. “Sebab juga Kristus telah

mati sekali untuk segala dosa kita, Dia yang benar untuk orang yang tidak benar, supaya Dia membawa kita kepada Allah...” (1 Petrus 3:18). Kematian Tuhan Yesus adalah sesuatu yang sesuai dengan Kitab Suci. “Sebab yang sangat penting telah kusampaikan kepadamu, yaitu apa yang telah kuterima sendiri, ialah bahawa Kristus telah mati kerana dosa kita, sesuai dengan Kitab Suci” (1 Korintus 15:3).

3. Tebusan Bagi Dosa Dunia

Tuhan Yesus mati bagi seluruh dunia yang berada dalam bahaya pembersihan. Tebusan dosa untuk segenap manusia sudah dilakukan oleh Tuhan Yesus di kayu salib. Ketika Yohanes Pembaptis menampak Tuhan Yesus, dia segera berseru, “Lihatlah Anak domba Allah, yang menghapus dosa dunia” (Yohanes 1:29). Pada waktu yang ditentukan oleh Allah, Tuhan Yesus telah menjadi tebusan bagi semua, “yang telah menyerahkan diri-Nya sebagai tebusan bagi semua manusia: itu kesaksian pada waktu yang ditentukan” (1 Timotius 2:6).

Brian G. Hedge berkata, “Kayu salib bukan hanya hukuman mati ke atas seorang nabi Yahudi. Ia merupakan satu tebusan, Tuhan Yesus mati untuk menggantikan penghukuman kita.”¹²

Penulis J. Oswald Sanders menjelaskan penebusan bukan seperti menyelamatkan seseorang dari mati lemas:

“Dengan penebusan kita tidak berarti menyelamatkan nyawa seseorang dengan hanya pertolongan, atau sekedar melemparkan tali untuk menyelamatkan seseorang yang sedang mati lemas, atau membahayakan nyawa sendiri untuk menyelamatkan orang lain, melainkan sebagai pengganti, Kristus telah mengambil ke atas diri-Nya kesalahan pendosa dan menanggung penghukuman demi pendosa.”¹³

4. Murka Allah Ditanggung-Nya

Setiap manusia telah berdosa terhadap Allah maka penyelamatan diperlukan semua orang. “Kerana semua orang telah berbuat dosa dan telah kehilangan kemuliaan Allah” (Rom 3:23). Murka Allah sudah dipuaskan Allah sepenuhnya di kayu salib.

John Stott menjelaskannya:

“Di kayu salib Allah dalam kasih suci-Nya melalui Kristus membayar seluruh hukuman ketidaktaatan kita dalam Diri-Nya. Dia menanggung semua penghukuman yang layak kita terima agar pengampunan, yang seharusnya tidak layak kita terima terlaksana. Di kayu salib, rahmat ilahi dan keadilan dinyatakan serentak dan kita diperdamaikan selama-lamanya. Kasih kudus Allah “dipuaskan.” Kasih Ilahi memenangi murka Ilahi melalui pengorbanan Ilahi dalam Diri-Nya.”¹⁴

Hal pemuasan keadilan Allah yang ditanggung oleh Yesus Kristus pernah dinubuat oleh nabi Yesaya.

“Sesudah kesusahan jiwanya ia akan melihat terang dan menjadi puas; dan hamba-Ku itu sebagai orang yang benar, akan membenarkan banyak orang oleh hikmatnya. Dan kejahatan mereka dia pikul” (Yesaya 53:11).

5. Manusia Diperdamaikan Dengan Allah

- a. Manusia yang terpisah daripada Allah akibat dosa, telah menjadi musuh Allah, kini diperdamaikan kepada-Nya. Rasul Paulus menjelaskan perdamaian ini dalam suratnya kepada jemaah Korintus dengan jelas. “Dan semuanya ini daripada Allah, yang dengan perantaraan Kristus telah mendamaikan kita dengan diri-Nya dan telah mempercayakan pelayanan perdamaian itu kepada kami” (2 Korintus 5:16).
- b. Kematian Tuhan Yesus telah melepaskan manusia dari kutukan hukum Taurat. Kutukan akibat pelanggaran terhadap hukum Taurat. “Kristus telah menebus kita dari hukum Taurat dengan jalan menjadi kutuk kerana kita, sebab ada tertulis: “Terkutuklah orang yang digantung di kayu salib!” (Galatia 3:13).
- c. Hutang dosa pun dibayarinya, “dengan menghapuskan surat hutang, yang oleh ketentuan-ketentuan hukum mendakwa dan mengancam kita. Dan itu ditiadakan-Nya dengan memakukannya pada kayu salib” (Kolose 2:14).

6. Darah Kristus

Darah Kristus yang tercurah di kayu salib menyucikan hati nurani akibat tertuduh oleh perbuatan dosa.

- a. Penulis Ibrani menghayati hal ini, “Betapa lebihnya darah Kristus, yang oleh Roh yang kekal telah mempersembahkan diri-Nya sendiri kepada Allah sebagai persembahan yang tidak bercacat, akan menyucikan hati nurani kita dari perbuatan-perbuatan yang sia-sia, supaya kita dapat beribadah kepada Allah yang hidup” (Ibrani 9:14).
- b. Kita kini tampil di hadirat yang Maha Kudus dengan penuh keberanian. “Jadi, saudara-saudara, oleh darah Yesus kita sekarang penuh keberanian dapat masuk ke dalam tempat kudus, kerana Dia telah membuka jalan yang baru dan yang hidup bagi kita melalui tabir, iaitu diri-Nya sendiri...kerana itu marilah kita menghadap Allah dengan hati yang tulus ikhlas dan keyakinan iman yang teguh, oleh kerana hati kita telah dibersihkan dari hati nurani yang jahat dan tubuh kita telah dibasuh dengan air yang murni” (Ibrani 10:20-22).

7. Disalibkan Bersama Tuhan Yesus

- a. Kuasa dosa tidak mengawal tubuh kita lagi kalau kita menyalibkan manusia lama bersama Tuhan Yesus. Rasul Paulus menasihati agar manusia lama kita di salibkan:

“Kerana kita tahu, bahawa manusia lama kita telah turut disalibkan, supaya tubuh dosa kita hilang kuasanya, agar jangan kita menghambakan diri lagi kepada dosa..Jadi jika kita telah mati dengan Kristus, kita percaya, bahawa kita akan hidup juga dengan Dia” (Roma 6:6,8).

- b. Kita hidup bersama-sama dengan-Nya selalu; kita mati dalam dosa tetapi dihidupkan bersama Dia dalam kehidupan baru. “Kerana Allah tidak menetapkan kita untuk ditimpa murka, tetapi untuk beroleh penyelamatan oleh Yesus Kristus, Tuhan kita, yang sudah mati untuk kita supaya entah kita berjaga-jaga, entah kita tidur, kita hidup bersama-sama dengan Dia” (1 Tesalonika 5:10,11)

Kayu Salib dan Saya

Donald Guthrie memerhatikan bahawa sebenarnya, Tuhan Yesus mempunyai kuasa untuk menolak dicambuk dan disalib:

“Sebelum membebaskan Tuhan Yesus untuk penyaliban, Pilatus mengarah agar Dia dicambuk. Ini adalah perbuatan yang biadap dan tidak bertamadun yang sering dilakukan waktu itu. Para Penginjil tidak menceritanya dengan terperinci. Cambukan tali kulit mengenakan luka jasmani yang dalam, satu lambang ketidakpermanusiaan manusia. Hal ini sudah cukup memadai untuk mengatakan tiada sesiapa dapat dibebaskan daripada penghukuman kalau mereka menolak Mesias. Penulis-penulis tidak mencatat fikiran yang terlintas dalam benak Yesus terhadap penderitaannya ini. Mereka ada menulis tentang tekanan minda yang membuat Dia gelisah. Kemudian, orang Kristian mulai menyedari bahawa Yesus adalah seperti domba yang dibimbing ke tempat pembantaian. Yang berbeza ialah Mesias mempunyai kuasa menolak atau menghalangi tindakan mereka kalau Dia ingini. Tiada gambaran lain yang menggambarkannya sebaik ini tentang sikap-Nya dalam penerimaan segenapnya

peranan-Nya sebagai Mesias. Dia menunduk Diri kepada penghinaan dan penyiksaan tali pencambuk.” Aku menyembah Engkau Domba Allah yang rela disiksa demi dosaku.



Saat Berbincang

1. Mengapakah Tuhan Yesus tidak perlu mempersembahkan korban berkali-kali? (Ibrani 9:25,26)
2. Orang jenis bagaimanakah yang dapat membenarkan dosa manusia? (1 Petrus 3:18)

3. Menurut Oswald Sanders, apakah menyelamatkan ditafsir dengan pengertian seperti Dia melemparkan tali untuk menyelamatkan kita?

4. Menurut John Stott apakah yang sudah “dipuaskan” di kayu salib?

5. Apakah yang terpaku di kayu salib Tuhan Yesus?
(Kolose 2:14)

6. Adakah Kristus mati bagi kita sewaktu kita sangat baik dan taat? (Roma 5:6,7, 8)

7. Bagaimanakah kita hidup baru dalam Kristus?
(Roma 6:6,7,8)

PELAJARAN

7

Kebangkitan Tuhan Yesus



Kebangkitan Yesus dari maut sungguh penting kerana tanpa kebangkitan-Nya segala yang kita percaya tentang Injil hanya kekosongan. Rasul Paulus berkata, “Tetapi andaikata Kristus tidak dibangkitkan, maka sia-sialah pemberitaan kami dan sia-sialah juga kepercayaan kamu” (1 Korintus 15:14). Seandainya, Kristus tidak bangkit dari maut, segala penghuraian tentang penebusan yang dilakukan-Nya di kayu salib, sia-sia belaka, tak sah. Kita akan menjadi orang yang paling malang kerana mempercayai Tuhan yang sudah mati (1 Korintus 15:17,18,19).

Sewaktu Tuhan Yesus bangkit dari maut, sambil makan ikan goreng di depan mata beberapa pengikut-Nya, Dia menjelaskan kebangkitan-Nya sebagai pengenapan seluruh ajaran nabi, hukum Musa, dan Pemazmur.

“Dia berkata kepada mereka: “Inilah perkataan-Ku, yang telah Ku-katakan kepadamu ketika Aku masih bersama-sama dengan kamu, yakni bahawa harus digenapi semua yang ada tertulis tentang Aku dalam kitab Taurat Musa dan kitab nabi-nabi dan kitab Mazmur. Lalu Dia membuka fikiran mereka, sehingga mereka mengerti Kitab Suci. Kata-Nya kepada mereka: “Ada tertulis demikian: Mesias harus menderita dan bangkit daripada antara orang mati pada hari ketiga” (Lukas 24:44, 45, 46)

Saksi-Saksi

Kebangkitan Tuhan Yesus bukan cerita rekaan sahaja kerana kalau kita membaca Injil kita mengetahui betapa hairannya para murid-Nya. Mereka teramat takut dan menyangka mereka ternampak hantu. Namun, Tuhan Yesus yang bangkit bersabda kepada mereka waktu mereka berkumpul, “Lihatlah tangan-Ku

dan kaki-Ku: Aku sendirilah ini: raba Aku dan lihatlah, kerana hantu tidak ada daging dan tulangnya, seperti kamu lihat ada pada-Ku”(Lukas 24:39).

Tubuh Kristus tidak ada dalam kubur biarpun kubur itu sudah dimeteraikan dan dikawal ketat oleh askar-askar Rom. Tuhan Yesus yang bangkit menampakkan diri kepada Maria Magdalena (Yohanes 20:15, 16; Markus 16:9), wanita-wanita lain (Matius 28:9,10); Petrus (Lukas 24:34); Tomas yang ragu akan kebangkitan-Nya (Yohanes 20:26-29); para rasul yang sedang memancing di danau Tiberias (Yohanes 21:1-4); kepada orang ramai yang berada di bukit (Matius 28:16); kepada Yakobus (1 Korintus 15:7); dan juga kepada Rasul Paulus (1 Korintus 15:8).

Jenis Tubuh Yang Bangkit

Tubuh Yesus yang bangkit semula mulia, tubuh-Nya tidak dapat dibatasi baik oleh pintu mahupun tembok. Tubuh-Nya dipulihkan kepada keadaan sempurna bahkan sehingga tahap yang jauh lebih tinggi, namun boleh disentuh:

“Ketika hari sudah malam pada hari pertama minggu itu berkumpullah murid-murid Yesus di suatu tempat dengan pintu-pintu yang terkunci kerana mereka takut kepada orang Yahudi. Pada waktu itu datanglah Yesus dan berdiri di tengah-tengah mereka dan berkata: “Damai sejahtera bagi kamu!” Dan sesudah berkata demikian, Dia menunjukkan tangan-Nya dan lambung-Nya kepada mereka. Murid-murid itu bersukacita ketika mereka melihat Tuhan” (Yohanes 20:19,20)

Setelah bangkit, Tuhan Yesus dapat makan, “Lalu mereka memberikan kepada-Nya sepotong ikan goreng. Dia mengambilnya dan memakannya di depan mata mereka” (Lukas 24:42-43).

Keputusan Kebangkitan Tuhan Yesus

Rasul Paulus mengajar bahawa kalau Tuhan Yesus tidak dibangkit maka kita masih tinggal dalam dosa kita. “Dan jika Kristus tidak dibangkitkan maka...kamu masih hidup dalam dosamu” (1 Korintus 15:17). Jika Tuhan Yesus tidak bangkit maka kita yang mati dalam Kristus binasa kerana Injil tiada kuasa kebangkitan. “Demikianlah binasa juga orang yang mati dalam Kristus” (1 Korintus 15:18). Sebaliknya, nada kemenangan ditekankan oleh Rasul Paulus, “Tetapi sesungguhnya Kristus sudah dibangkitkan daripada antara orang mati” (1 Korintus 15:20).

Louis Berkhof ahli teologi berkata Tuhan Yesus adalah Pengarang kebangkitan. “Suatu hal yang berbeza Kristus yang dibangkitkan dari maut daripada yang lain ialah Kristus bangkit atas dasar kuasa-Nya sendiri.”¹⁶ Dia pernah bersabda tentang kebangkitan-Nya sendiri, “Jawab Yesus: “Akulah kebangkitan dan hidup; barangsiapa percaya kepada-Ku, dia akan hidup walaupun dia sudah mati” (Yohanes 11:25).

Selain itu Tuhan Yesus pernah dalam metafora mencerita tentang kebangkitan-Nya. Dalam penjelasan ini, tubuh-Nya akan bangkit dalam tiga hari.

“Jawab Yesus kepada mereka: “Rombak Bait Allah ini, dan dalam tiga hari Aku akan mendirikanNya kembali. Lalu kata orang Yahudi kepada-Nya: “Empat puluh enam tahun orang mendirikan Bait Allah ini dan Engkau dapat membanggunya dalam tiga hari? Tetapi yang dimaksudkan-Nya dengan Bait Allah ialah tubuh-Nya sendiri” (Yohanes 2:19-21). Walau bagaimanapun, Tritunggal turut dalam kebangkitan ini seperti yang dijelaskan oleh Rasul Paulus. “Allah yang membangkitkan Tuhan, akan membangkitkan kita juga oleh kuasa-Nya” (1 Korintus 6:14).

Permata-Permatanya

1. Pengakuan Bapa Bahawa Yesus Anak-Nya

Kubur yang kosong mengesahkan Yesus Kristus adalah Anak Allah kerana ini pengakuan Bapa bahawa Yesus adalah Anak-Nya, dan penggenapan Perjanjian Mesias. “Telah digenapi Allah kepada kita, keturunan mereka, dengan membangkitkan Yesus, seperti yang ada tertulis: “Anak-Ku Engkau! Aku telah memperanakkan Engkau pada hari ini” (Kisah Para Rasul 13:33).

Kebangkitan ini juga menandakan karya Allah Bapa dalam rencana-Nya yang terindah.

- a. Rasul Paulus berkhotbah, “Tetapi Allah membangkitkan Dia dengan melepaskan Dia dari sengsara maut, kerana tidak mungkin Dia tetap berada dalam kuasa maut itu. Sebab Daud berkata tentang Dia: Aku sentiasa memandang Tuhan, kerana Dia berdiri di sebelah kananku, aku tidak goyah” (Kisah Para Rasul 2:24,25).

- b. “Demikianlah Dia, Pemimpin kepada hidup, telah kamu bunuh, tetapi Allah telah membangkitkan Dia daripada antara orang mati; dan tentang hal itu kami adalah saksi” (Kisah Para Rasul 3:15).
- c. Karya Bapa diulangi Rasul Paulus di kalangan gereja, “yang dikerjakan-Nya di dalam Kristus dengan membangkitkan Dia dari antara orang mati dan mendudukkan Dia di sebelah kanan-Nya di syurga” (Efesus 1:20).

2. Umat Yang Percaya Dibenarkan

Kebangkitan Tuhan Yesus membenarkan umat yang percaya kerana penebusan menjadi berkesan.

Rasul Paulus berkata, “tetapi ditulis juga untuk kita; sebab kepada kita pun Allah memperhitungkannya, kerana kita percaya kepada Dia, yang telah membangkitkan Yesus, Tuhan kita, daripada antara orang mati, iaitu Yesus, yang telah diserahkan kerana pelanggaran kita dan dibangkitkan kerana penebusan kita, ” (Roma 4:24,25).

3. Pembela dan Imam Besar Yang Hidup

Tuhan Yesus digambarkan dalam Alkitab sebagai bangkit dan memerintah di sebelah kanan Allah Bapa. “Kristus Yesus, yang telah mati? Bahkan lebih lagi: yang telah bangkit, yang juga duduk di sebelah kanan Allah, yang malah menjadi Pembela bagi kita”(Roma 8:34). Kebangkitan-Nya juga mengesahkan dia sebagai Pengantara yang berkesan dan juga Imam Besar yang hidup:

“Kerana itu Dia sanggup juga menyelamatkan dengan sempurna semua orang yang oleh Dia datang kepada Allah. Sebab Dia hidup sentiasa untuk menjadi Pengantara mereka. Sebab Imam Besar yang demikianlah yang kita perlukan: iaitu yang salih, tanpa salah, tanpa noda, yang terpisah daripada orang-orang berdosa dan lebih tinggi daripada tingkat-tingkat syurga” (Ibrani 7:25, 26).

4. Kuasa Kebangkitan--Hidup Baru

Kuasa kebangkitan Tuhan Yesus memampukan kita hidup dalam kekudusan kalau kita tinggal dalam Dia.

- a. Kita yang bangkit bersama dia dipanggil untuk berbuah bagi-Nya. “Sebab itu, saudara-saudaraku, kamu juga telah mati bagi hukum oleh tubuh Kristus, supaya kamu menjadi milik orang lain, iaitu milik Dia, yang telah dibangkitkan antara orang mati, agar kita berbuah bagi Allah” (Roma 7:4).
- b. Untuk berbuah bererti hidup dalam kuasa kebangkitan-Nya. “Yang kukehendaki ialah mengenal Dia dan kuasa kebangkitan-Nya dan persekutuan dalam penderitaan-Nya, di mana aku menjadi serupa dengan Dia dalam kematian-Nya” (Filipi 3:10).

5. Kebangkitan Tubuh Orang Kristian

Kebangkitan tubuh Kristus menjadi contoh kebangkitan kita.

- a. “Tetapi yang benar ialah, bahawa Kristus telah dibangkitkan daripada antara orang mati, sebagai sulung daripada orang yang telah meninggal. Sebab sama seperti maut datang kerana satu orang manusia,

demikian juga kebangkitan orang mati datang kerana satu orang manusia” (1 Korintus 15:20-21).

- b. “Kerana kami tahu, bahawa Dia yang telah membangkitkan Tuhan Yesus, akan membangkitkan kami juga bersama-sama dengan Yesus...” (2 Korintus 4:14).

Penghiburan tertinggi kepada semua yang mengikut Dia ialah kita tidak akan mati!

- c. “Sesungguhnya aku menyatakan kepadamu suatu rahsia; kita tidak akan mati semuanya, tetapi kita semuanya akan diubah, dalam sekejap mata, pada waktu bunyi nafiri yang terakhir. Sebab nafiri akan berbunyi dan orang-orang mati akan dibangkitkan dalam keadaan yang tidak dapat binasa dan kita semua akan diubah...Hai maut, di manakah sengatmu?” (1 Korintus 15:51-52).

Teori-Teori Yang Menentang Kebangkitan Yesus

1. Teori Kepalsuan

Teori ini menyatakan murid-murid Yesus merancangkan satu kepalsuan dengan mencuri mayat Yesus lalu menyebarkan kepalsuan tentang kebangkitan-Nya. Hal ini sama sekali tidak mungkin kerana askar-askar sedang mengawal kubur Yesus, dan teori ini tidak masuk akal sebab tidak mungkin murid-murid Yesus mahu menghadapi ancaman maut daripada raja bengis kalau Yesus sudah mati.

Penjelasan bahawa kemungkinan besar askar-askar sedang mendengkur sewaktu tubuh Kristus dicuri tidak

masuk akal. Pendapat ini rekaan saja kerana tiada sebarang laporan mengenai kehilangan kecurian. Selain itu, batu yang menutup kubur sungguh besar.

Josh McDowell sewaktu berdebat dengan Ahmad Deedaat berbahas, “Menjawab mengenai tubuh Kristus yang dicuri, Josh menjelaskan keadaan pengikut-pengikut yang kecewa dan takut menjadikan alasan ini sulit diterima. Bagaimana mungkin mereka tiba-tiba menjadi begitu berani dan menghadapi askar-askar yang mengawal kubur-Nya dan mencuri mayat-Nya?”

Paul E. Little memberi satu pengesahan kebangkitan Yesus:

“Petrus berkhotbah tentang kebangkitan Yesus di Yerusalem, di tempat sama di mana peristiwa tersebut berlaku; tempat kebenaran fakta-fakta peristiwa ini boleh diperiksa bahkan disahkan apalagi tempat tinggal Petrus yang sering diserangi ancaman maut.” Mengapakah Petrus begitu berani kalau Tuhan Yesus tidak bangkit?¹⁷

2. Teori Pengsan

Teori ini mengatakan Tuhan Yesus pengsan saja. Bagaimanakah teori ini menjelaskan keadaan Tuhan Yesus selepas tertusuk lembing? Bagaimana pula Tuhan Yesus yang luka parah mengguling batu kubur yang berat?

Louis Berkhof bertanya, “Bagaimanakah kita menjelaskan kenapa murid-muridnya tidak memperlakukan Dia seperti orang yang sakit, tetapi menampak dalam Diri-Nya sebagai Putera yang berkuasa? Dan apakah yang terjadi

kepada Yesus setelah ini? Tanpa kebangkitan, kenaikan Yesus ke syurga juga ditiadakan. Jadi, adakah Dia ke tempat yang tidak diketahui semua dan tinggal dalam rahsia seumur hidup-Nya?"

3. Teori Khayalan atau Halusinasi

Teori ini membentangkan para murid Tuhan Yesus mengalami halusinasi sehingga mereka menampak penglihatan yang tidak wujud. Khayalan ini dicetuskan oleh Maria Magdalena kemudian merebak kepada semua murid. Penjelasan ini terlalu memaksa kerana penderitaan halusinasi biasanya dialami oleh hanya satu orang bukan sekumpulan orang bahkan mencecah 500 orang. Bagaimana mungkin 500 orang mengalami khayalan yang selama empat puluh hari?

4. Teori Para Murid ke Kubur Salah

Kalau mereka ke kubur yang salah, Josh Mcdowell bertanya, "Kalau kubur itu bukan kubur yang benar, para penguasa Yahudi pasti akan mengeluarkan mayat dari kubur yang benar. Dengan demikian, mereka dapat memadamkan semua khabar angin yang tersebar mengenai kebangkitan Tuhan Yesus."

Kebangkitan Tuhan Yesus dan Saya

C.S. Lewis mengatakan peristiwa kebangkitan Tuhan Yesus satu-satunya peristiwa terulung dalam sejarah. Beliau berkata bab baru dalam sejarah manusia dibukakan:

“Penulis-penulis Perjanjian Baru menceritakan pencapaian Kristus iaitu kebangkitan-Nya dari maut sebagai peristiwa terulung, jenis seperti ini pertama dalam seluruh sejarah alam semesta. Dia adalah “buah-buah pertama,” perintis hidup. Dia telah memecahkan pintu yang terkunci sejak kematian manusia yang pertama. Dia telah bertemu, berperang, dan mengalahkan Raja Maut. Segala sesuatu sudah berbeza kerana Dia berbuat demikian. Inilah permulaan Ciptaan Baru: bab baru dalam sejarah kosmik yang telah dibukakan-Nya.”¹⁸ O Rajaku, aku bersyukur atas bab baru yang Engkau ciptakan dalam hidupku.

Saat Berbincang

1. Mengapakah kebangkitan Tuhan Yesus sungguh penting menurut Rasul Paulus? (1 Korintus 15:14)
2. Bagaimanakah keadaan kita kalau Tuhan Yesus tidak dibangkit? (1 Korintus 15:17, 18,19)
3. Benarkah tubuh Yesus yang bangkit itu hanya merupakan roh sahaja?

Kebangkitan Tuhan Yesus

4. Mengapakah kebangkitan Tuhan Yesus boleh menjadi penghiburan bagi orang Kristian? (1 Korintus 6:14)

5. Kenapakah Yesus sebagai Imam Besar hanya perlu membuat korban sekali untuk selama-lamanya? (Ibrani 7:26,27)

6. Apakah yang diberikan kepada orang yang percaya melalui kebangkitan Tuhan Yesus? (1 Petrus 1:3; Roma 6:4)

7. Apakah satu bukti yang diberikan Allah Bapa kepada manusia tentang Anak-Nya sebelum hari penghakiman? (Kisah Para Rasul 17:31)

PELAJARAN

8

Kenaikan dan
Pemuliaan
Yesus Kristus



Penglihatan para nabi bukan sahaja Hamba Menderita di kayu salib yang mengosongkan diri hingga mati di kayu salib. Ajaibnya, mereka pun bernubuat tentang saat mulia, saat Tuhan Yesus dinaikkan dan dipemuliakan sebagai Raja. “Demikianlah firman TUHAN kepada tuanku: “Duduklah di sebelah kanan-Ku, sampai Kubuat musuh-musuhmu menjadi tumpuan kakimu” (Mazmur 110:1). Tuhan Yesus sendiri melihatnya dalam lembayung mata-Nya, saat kenaikan-Nya sewaktu para murid-Nya bersama-Nya di Galilea. “Dan bagaimanakah, jikalau kamu melihat Anak Manusia naik ke tempat di mana Dia sebelumnya berada?” (Yohanes 6:62).

Seandainya Kristus mati dan berhenti saja di salib,
Karya-Nya menjadi kurang sempurna,
Jika Kristus yang dikuburkan hanya tinggal dalam kubur,
Dia hanya mengetahui kekalahan.
Tetapi jalan salib tidak berhenti pada salib.
Jalan ke kubur menyelusuri
Ke anugerah kemenangan di tempat syurgawi
Di mana Tuhan yang bangkit sudah pergi. (Anne Johnson Flint)

Kesaksian Penulis-Penulis Injil

Penulis-penulis Injil menyebutkan hal ini berulang kali.

- a. “Setelah Tuhan Yesus berbicara demikian kepada mereka, terangkatlah Dia ke syurga, lalu duduk di sebelah kanan Allah” (Markus 16:19).
- b. Peristiwa kenaikan Tuhan Yesus diceritakan dengan sukacita seperti kelahiran-Nya. “Dan ketika Dia sedang memberkati mereka dan terangkat ke syurga. Mereka sujud menyembah kepada-Nya, lalu mereka pulang ke Yerusalem dengan sangat bersukacita” (Lukas 24:51-52).

- c. Tuhan Yesus berkata Maria Magdalena, “Janganlah engkau memegang Aku, sebab Aku belum pergi kepada Bapa, tetapi pergilah kepada saudara-saudara-Ku dan katakanlah kepada mereka, bahawa sekarang Aku akan pergi kepada Bapa-Ku dan Bapamu, kepada Allah-Ku dan Allah-mu” (Yohanes 20:17).

Nada Kemenangan Tertinggi

Rasul Paulus memberi nada kemenangan tertinggi tentang kebangkitan dan kenaikan Tuhan Yesus, yang merupakan penggenapan segala sesuatu ajaran nabi. Kemenangan ini jauh-jauh hari sudah dinubuatkan dalam Mazmur 68:19. Rasul Paulus menyatakan bahawa kenaikan Tuhan Yesus mengalahkan semua musuh dan mencurahkan pemberian.

“Tatkala Dia naik ke tempat tinggi, Dia membawa tawanan-tawanan; Dia memberikan pemberian-pemberian kepada manusia. Bukankah “Dia telah naik” bererti, bahawa Dia juga telah turun ke bahagian bumi yang paling bawah? Dia yang telah turun, Dia juga yang telah naik jauh lebih tinggi daripada semua langit, untuk memenuhi segala sesuatu. Dan Dialah yang memberikan baik rasul-rasul mahupun nabi-nabi, baik pemberita-pemberita Injil mahupun gembala-gembala dan pengajar-pengajar” (Efesus 4:8-10).

Permata-Permata Tentang Kenaikan Tuhan Yesus

1. Tuhan Yesus Ditinggikan

Tuhan Yesus yang ditinggikan, juga duduk di sebelah kanan Allah.

- b. Efesus menceritakan betapa hebat kuasa Allah yang membangkit dan meninggikan Tuhan Yesus, “dan betapa hebat kuasa-Nya bagi kita yang percaya, sesuai dengan kekuatan kuasa-Nya, yang dikerjakan-Nya di dalam Kristus dengan membangkitkan Dia antara orang mati dan mendudukkan Dia di sebelah kanan-Nya di syurga” (Efesus 1:19-20).
- c. Sewaktu Stefanus dibunuh, dia melihat langit terbuka dan Anak Manusia berada di sebelah kanan Allah. “Lalu katanya: “Sungguh, aku melihat langit terbuka dan Anak Manusia berdiri di sebelah kanan Allah” (Kisah Para Rasul 7:56).
- d. Kitab Ibrani menasihati pembacanya untuk memegang teguh kepada pengakuan iman mereka kerana mereka mempunyai Imam Besar Agung yang tertinggi.

“Kerana kita sekarang mempunyai Imam Besar Agung, yang telah melintasi semua langit, iaitu Yesus, Anak Allah, baiklah kita teguh berpegang pada pengakuan iman kita” (Ibrani 4:14).”

Justru Imam Besar yang tiada cacat cela dan ditinggikan diperlukan oleh untuk kehidupan kita. “Sebab Imam Besar yang demikianlah yang kita perlukan: iaitu yang salih tanpa noda, yang terpisah daripada orang-orang berdosa dan lebih tinggi daripada tingkat-tingkat syurga” (Ibrani 7:26).

2. Kuasa Jahat Dilucutkan

Sewaktu Yesus Kristus bangkit dan ditinggikan, Dia melucuti kuasa jahat dan jauh lebih tinggi kuasa-Nya atas kuasa Iblis.

- a. “Dia telah melucuti pemerintah-pemerintah dan penguasa-penguasa dan menjadikan mereka tontonan umum dalam kemenangan-Nya atas mereka” (Kolose 2:15).
- b. Rasul Paulus menekankan hal ini, semua kuasa yang ada di langit dan di bumi mahupun di bawah bumi akan bertekuk lutut kepada-Nya:

“Itulah sebabnya Allah sangat meninggikan Dia dan mengaruniakan kepada-Nya nama di atas segala nama, supaya dalam nama Yesus bertekuk lutut segala yang ada di langit dan yang ada di atas bumi dan yang ada di bawah bumi, dan segala lidah mengaku: “Yesus Kristus adalah Tuhan,” bagi kemuliaan Allah, Bapa!” (Filipi 2:9-11).

3. Dialah Anak Allah

Kenaikan Tuhan Yesus teramat penting untuk menyempurnakan kematian Kristus dan kebangkitan-Nya kerana kenaikan-Nya membuktikan bahawa Allah telah menerima pengorbanan Yesus demi dosa umat manusia sepanjang waktu.

- a. “Dia adalah cahaya kemuliaan Allah dan gambar wujud Allah dan menopang segala yang ada dengan firman-Nya yang penuh kekuasaan. Dan setelah Dia selesai mengadakan penyucian dosa, Dia duduk di sebelah kanan Yang Maha Besar, di tempat yang tinggi” (Ibrani 1:3).

- b. Tambahan itu, kenaikan ini membuktikan Yesuslah Tuhan. “Jadi seluruh kaum Israel harus tahu dengan pasti, bahawa Allah telah membuat Yesus, yang kamu salibkan itu, menjadi Tuhan dan Kristus” (Kisah Para Rasul 2:36).
- c. Kenaikan-Nya juga membuktikan Dialah Anak Allah yang mulia. “dan menurut Roh kekudusan dinyatakan oleh kebangkitan-Nya daripada antara orang mati, bahawa Dia adalah Anak Allah yang berkuasa, Yesus Kristus Tuhan kita” (Roma 1:4).

4. Imam Besar Agung

Kenaikan Tuhan Yesus ke syurga juga bererti Dia berjabat sebagai Imam Besar yang Agung dan hidup.

- a. “Inti segala yang kita bicarakan itu ialah: kita mempunyai Imam Besar yang demikian, yang duduk di sebelah kanan takhta Yang Maha Besar di syurga” (Ibrani 8:1).
- b. Dia hidup sentiasa dalam tugas-Nya sebagai Pengantara antara manusia dan Allah. “Kerana itu Dia sanggup juga menyelamatkan dengan sempurna semua orang yang oleh Dia datang kepada Allah. Sebab dia hidup sentiasa untuk menjadi Pengantara mereka” (Ibrani 7:25).
- c. Tuhan Yesus dalam jabatan sebagai Pengantara yang esa tetap mendoakan kita yang berada di dunia ini. “Kerana Allah itu esa dan esa pula Dia yang menjadi Pengantara antara Allah dan manusia, iaitu manusia Kristus Yesus” (1 Timotius 2:5).

- d. Kita yang sudah menjadi anak-anak-Nya patut menjauhi diri dari dosa namun kalau kita berbuat dosa, datanglah kepada Pengantara seraya memohon pengampunan dosa. “Anak-anakku, hal-hal ini kutuliskan kepada kamu supaya kamu jangan berbuat dosa, namun jika seorang berbuat dosa, kita mempunyai seorang pengantara pada Bapa, iaitu Yesus Kristus, yang adil” (1 Yohanes 2:1).

5. Perintis Syurga

Fajar terang menerangi manusia sebab kematian, kebangkitan dan kenaikan Tuhan Yesus ke syurga kerana ini juga bererti Dia Perintis ke syurga bagi kita.

- a. Tuhan Yesus sewaktu bersama-sama para murid-Nya selalu memberitahu mereka bahawa Dia pergi untuk menyediakan tempat bagi mereka. Mereka tidak perlu khuatir ditinggalkan oleh Yesus, yang naik ke Syurga. Dengan penghiburan, Dia meyakinkan para pengikut-Nya akan diberikan tempat di syurga:

“Janganlah gelisah hatimu; percayalah kepada Allah, percayalah juga kepada-Ku. Di rumah Bapa-Ku banyak tempat tinggal. Jika tidak demikian, tentu Aku mengatakannya kepadamu. Sebab Aku pergi ke situ untuk menyediakan tempat bagimu. Dan apabila Aku telah pergi ke situ dan telah menyediakan tempat bagimu, Aku akan datang kembali dan membawa kamu ke tempat-Ku, supaya di tempat di mana Aku berada, kamu pun berada” (Yohanes 14:1-3).

- b. Kelak, mereka yang percaya kepada Domba Allah akan bersama-sama dengan-Nya:

“Kemudian daripada itu aku melihat: sesungguhnya, suatu kumpulan besar orang banyak yang tidak dapat terhitung banyaknya, daripada segala bangsa dan suku dan kaum dan bahasa, berdiri di hadapan takhta dan di hadapan Anak Domba, memakai jubah putih dan memegang daun-daun palem di tangan mereka” (Wahyu 7:9).

6. Roh Kuduslah Yang Diutus

Kenaikan Tuhan Yesus ke syurga tidak berarti umat-Nya akan tinggal di dunia sebagai anak yatim.

- a. Tuhan Yesus tidak pernah berkata Dia akan mengutus baik seorang nabi mahupun pesuruh yang lain ke dunia ini. Yang diutus-Nya ialah Roh Kudus:

“Aku akan minta kepada Bapa, dan Dia akan memberikan kepadamu seorang Penolong yang lain, supaya ia menyertai kamu selama-lamanya, iaitu Roh Kebenaran. Dunia tidak dapat menerima Dia, sebab dunia tidak melihat Dia dan tidak mengenal Dia. Tetapi kamu mengenal Dia, sebab Dia menyertai kamu dan akan diam di dalam kamu” (Yohanes 14:16,17).

- b. Perjanjian Tuhan Yesus telah digenapi pada hari Pentakosta dengan kedatangan Roh Kudus:

“Ketika tiba hari Pentakosta, semua orang percaya berkumpul di satu tempat. Tiba-tiba turunlah dari langit suatu bunyi seperti tiupan angin keras yang memenuhi seluruh rumah, di mana mereka duduk; dan tampaklah kepada mereka lidah-lidah seperti nyala api yang bertebaran dan hinggap pada mereka masing-masing. Maka penuhlah mereka dengan Roh Kudus, lalu mereka mulai berkata-kata dalam bahasa-bahasa lain, seperti yang diberikan oleh Roh itu kepada mereka untuk mengatakannya” (Kisah Para Rasul 2:1-4).

- c. Roh Allah juga memberi kesaksian bahawa kita adalah anak Allah:

“Sebab kamu tidak menerima roh perbudakan yang membuat kamu menjadi takut lagi, tetapi kamu telah menerima Roh yang menjadikan kamu anak Allah. Oleh Roh itu kita berseru: “Ya Abba, ya Bapa!” Roh itu bersaksi bersama-sama dengan roh kita, bahawa kita adalah anak-anak Allah” (Roma 8:15-16).

- d. Pencerahan Roh Kudus juga bererti pemberian karunia Roh Kudus kepada gereja sehingga gereja dapat dilayani dalam pelbagai selok belok:

”Dan Dialah yang memberikan baik rasul-rasul mahupun nabi-nabi, baik pemberita-pemberita Injil mahupun gembala-gembala dan pengajar-pengajar, untuk memperlengkapi orang-orang kudus bagi pekerjaan pelayanan, bagi pembangunan tubuh Kristus” (Efesus 4:11-12).`

7. Pemerintahan Segenap Alam

Kenaikan dan pemuliaan Tuhan Yesus diberi nada yang penuh kemenangan lagi oleh Rasul Paulus. Kenaikan-Nya oleh kuasa Allah menyebabkan segala sesuatu diletakkan di bawah kaki-Nya, dan juga memperbolehkan Dia menjadi Kepala Jemaat yang dilahir baru.

- a. Kuasa Tuhan Yesus lebih daripada segala penguasa dan kerajaan kegelapan:

“Jauh lebih tinggi daripada segala pemerintah dan penguasa dan kekuasaan dan kerajaan dan tiap-tiap nama yang dapat disebut, bukan hanya di dunia ini saja, melainkan juga di dunia yang akan datang. Dan segala sesuatu telah diletakkan-Nya di bawah kaki Kristus dan Dia telah diberikan-Nya kepada jemaah sebagai Kepala dari segala yang ada” (Efesus 1:21-22).

- b. Rasul Paulus bernada tentang kemenangan tinggi Kristus seperti yang pernah dinubuatkan dalam Mazmur 8:7 tentang penaklukan-Nya atas segalanya.

“Sebab segala sesuatu telah ditaklukkan-Nya di bawah kaki-Nya. Tetapi kalau dikatakan, bahwa “segala sesuatu telah ditaklukkan,” maka teranglah, bahwa Dia sendiri yang telah menaklukkan segala sesuatu di bawah kaki Kristus itu tidak termasuk di dalamnya. Tetapi kalau segala sesuatu telah ditaklukkan di bawah Kristus maka Dia sendiri sebagai Anak akan menaklukkan diri-Nya di bawah Dia, yang telah menaklukkan segala sesuatu di bawah-Nya, supaya Allah menjadi semua di dalam semua” (1 Korintus 15:27-28).

8. Permulaan Kedatangan-Nya Yang Mulia

- a. Kenaikan Tuhan Yesus ke syurga mengisahkan suatu permulaan kedatangan-Nya yang kedua kali dalam penuh kemuliaan sebagai Hakim. Ketika ditanyakan oleh Imam Besar sama ada Dia Mesias, Anak Allah, Tuhan Yesus menceritakan kenaikan-Nya. “Jawab Yesus: “Engkau telah mengatakannya. Akan tetapi, Aku berkata kepadamu, mulai sekarang kamu akan melihat Anak Manusia duduk di sebelah kanan Yang Maha Kuasa dan datang di atas awan-awan di langit” (Matius 26:64).
- b. Petrus juga menceritakan hal Yesus yang naik ke syurga akan menjadi Hakim bagi orang yang hidup dan orang yang mati. “Dan Dia telah menugaskan kami memberitakan kepada seluruh bangsa dan bersaksi, bahwa Dialah yang ditentukan Allah menjadi Hakim atas orang-orang hidup dan orang-orang mati” (Kisah Para Rasul 10:42).

“Lalu semua bangsa akan dikumpulkan di hadapan-Nya dan Dia akan memisahkan domba dari kambing, dan Dia akan menempatkan domba-domba di sebelah kanan-Nya dan kambing-kambing di sebelah kiri-Nya” (Matius 25:32-33).

Rasul Petrus menjelaskan penghakiman pada hari itu bermula dengan mereka yang berada dalam rumah Allah sendiri, iaitu mereka yang mengenal Dia.

“Kerana sekarang telah tiba saatnya penghakiman dimulai, dan pada rumah Allah sendiri yang harus pertama-tama dihakimi. Dan jika penghakiman itu dimulai pada kita, bagaimanakah kesudahannya dengan mereka yang tidak percaya pada Injil Allah? Dan jika orang benar hampir-hampir tidak diselamatkan, apakah yang akan terjadi dengan orang fasik dan orang berdosa?” (1 Petrus 4:17,18)

Penabalan Di Syurga

“Seandainya penobatan-Nya di bumi dan bukan syurga, fikiran dan hati manusia terhadap-Nya hanya terbatas di bumi. Tetapi Kenaikan-Nya mengarahkan fikiran dan hati manusia ke atas...Dia Manusia Yang Menderita dan yang biasa dengan tangisan, juga Anak kesayangan Bapa. Di luar batas pengertian kita, Dia yang turun dari kayu salib naik ke syurga, dan kemuliaan yang bersinar terang di Gunung Pemuliaan (Transfiguration) akan menjadi kemuliaan-Nya selama-lama-Nya. Kenaikan-Nya menyingkirkan keraguan kita mengenai sifat kemanusiaan-Nya dan memperkenalkan Dia sebagai yang bersekutu intim dan kekal bersama Allah.”¹⁹

Kenaikan Tuhan Yesus dan Saya

“Kami memohon, ya Allah Maha Kuasa, seperti yang kami percaya bahawa Anak Tunggal-Mu, Yesus Kristus sudah naik ke dalam syurga, biarlah hati dan fikiran kami pun naik ke sana dan tinggal bersama-Nya, yang memerintah bersama Engkau dan Roh Kudus, satu Allah, dunia tanpa keakhiran” (The Collect of Ascension Day).

Saat Berbincang

1. Mengapakah saat kenaikan Tuhan Yesus dan saat Dia duduk di sebelah kanan Allah Bapa begitu penting? (Mazmur 110:1; Kolose 2:15)
2. Apakah yang diberikan oleh Tuhan Yesus sewaktu Dia naik ke syurga? (Efesus 4:10, 11)
3. Jenis Imam apakah yang kita miliki sehingga kita perlu pegang teguh kepada pengakuan iman kita? (Ibrani 8:6)
4. Adakah Tuhan Yesus berjanji akan mengutus seorang nabi atau pesuruh kepada kita setelah Dia naik ke syurga? Siapakah yang akan datang tinggal bersama kita? (Yohanes 14: 16,17)

5. Baca Matius 26:64 dan Daniel 7:13, dan cari persamaan gagasan fikirannya.

6. Apakah Tuhan Yesus akan lakukan sebagai Imam yang sudah naik ke syurga? (Ibrani 4:14, 15, 16)

7. Jaminan apakah yang diberikan oleh Tuhan Yesus dengan kenaikan-Nya? (Yohanes 14:2, 3)

8. Jelaskan satu tugas yang akan dilakukan oleh Tuhan Yesus yang bersemayam di kanan Allah Bapa. (1 Timotius 2:5)

Bibliografi

1. Bruce Milne, Know The Truth (Nottingham:IVP, 1998, 2nd Edition) hal. 90.
2. Anthony A. Hoekema, Created in God's Image (Grand Rapids, MI:Wm B. Eerdmans Publishing Company, 1986) hal. 52.
3. John M. Frame, The Doctrine of God (New Jersey, P&R Publishing, 2002) hal. 298
4. Louis Berkhof, Systematic Theology (Michigan: WM.B Eerdmans Publishing, 1979) hal.166.
5. J. Wesley Brill, Dasar Yang Teguh (Bandung: Pener bit Kalam Hidup) hal 68
6. C.I Williamson, The Westminster Shorter Catechism (New Jersey: P &R, 1970) hal. 61
7. Bruce Milne, hal. 133
8. John Calvin, John T. McNeil, ed., Ford L.Battles, trans., Institutes of the Christians Religion, Book 1, Bab XV, 4 (Philadelphia, PA: The Westminster Press, 1960) 189.
9. J. I. Packer, Rediscovering Holiness (Ann Arbor, MI: Vine Books, 1992) hal 90.
10. T.C. Hammond, In Understanding Be Man (Leicester :IVP, 1968) 95
11. Berkhof, Systematic Theology, hal. 333
12. Brian G. Hedge, Christ Formed in You (Wapwollopen, Pennsylvania: Shepherd Press, 2010) hal. 45
13. J. Oswaqld Sanders, The Incomparable Christ (Chicago, IL:Moody Press, 1971) hal. 150
14. John R.W. Stott, The Cross of Christ (Downers Grove, IL: InterVarsity Press, 1986) hal. 89, 159)
15. Donald Guthrie, Jesus The Mesiah (Michigan:Zondervan Publishing House, 1972) hal 343
16. Berkhof, Systematic Theology, hal 346.
17. Paul E. Little, Tahukah SebabNya Anda Percaya? (Petaling Jaya: SU/FES, 2013) hal. 45
18. C.S. Lewis, Miracles (New York, NY: Harper Collins, 1947), hal. 236-237.
19. Fulton J. Sheen, Life of Christ (Asian Tradin Corporation: Bangalore, 1958) hal. 441